

## CARTA JEE NI TEE SAN PABLO APOSTOL NUU ÑAYUU ÑUU ROMA

<sup>1</sup> Máá rí cúu Pablo, mozo Jesucristo, chi ni cana Yaā Dios ruhū cúu ri apóstol yā, ni jeni ya ruhū te ni tají yá ruhū jeē nácani ri jnūhun jeē jnáma ya ñayuu.

<sup>2</sup> Te jnūhun un ní jejnūhun ya nde jenahán ndasí, te yósó núu tútu iī jeē ní catee tēe ni canacani jnūhun ya.

<sup>3</sup> Te jnūhun un cáhán siquī Jitoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chíji yucūn rey David. <sup>4</sup> Te ni natecu yā mēhñu ndíyí ni sáha Espíritu iī, te súcuan ni steén Yaā Dios jeē cúu ya Sēhe ya jeē ndíso poder. <sup>5</sup> Te jeē jíin Jesucristo ni jēhe Yaā Dios jniñu luu yáha jeē cácuu ri apóstol, cájica ri jíin jnúhun Cristo, návaha coo ñayuu tácá nación jeē candíje i jeē sáha ya jehē i, te cuatáhú i nuū yā. <sup>6</sup> Te suni máá ró jijnáhan ró, suni ni cana ya rohó ní quívicoo ró ndaha Jesucristo.

<sup>7</sup> Te tée ri carta yáha cuajeē nuū rohó ñayuu ñuu Roma. Chi ni cundáhú ni Yaā Dios rohó, te ni cana ya rohó jéē coo ndoo coo iī rō nuū yā. Te ñúhun ni rī jeē maá Tátá yō Yaā Dios jíin Jítoho yō Jesucristo sáha ga yā jeē váha róhó, te sáha ya jeē coo ndeyí coo sñ ni rō.

### *Jeē cuní Pablo quihín de ñuu Roma*

<sup>8</sup> Te xīhna gā cástūhun rí nuū rō jeē nácuatáhú rí nuū Yaā Dios jeē siquí rohó jijnáhan ró, chi ni sáha Jesucristo jeē váha róhó. Chi ní ñáyívi jíité núu jnūhun cuahān ndese vāha cácuandíje ró yá. <sup>9</sup> Te máá Yaā Dios jíin yā jeē níin jíicán tahu rī jehē rō jijnáhan ró nuū jíicán tahu rī. Chi yōhyo ndíhví ni rī jejníñu ri nuū yā jeē nácani ri jnūhun Sēhe ya. <sup>10</sup> Te níin jíicán tahu rī nuū yā jeē núu cúní yā te nde vijna te cuu jecondēhe rí rohó. <sup>11</sup> Chi cúu ni rī

coto ri nuū rō jijnáhan ró, te stéén gā rī jnūhun ya nuū rō, návāha quendōo vāha ga anuá rō te cuiñi nihin ga rō jín. <sup>12</sup> Súcuan cúní rī návāha sáha yó jéē inuú coo ndeyí ni yō jijnáhan yó siquī jeē ínuú cá candíje yó yá.

<sup>13</sup> Hermano jijnáhan ró, cúní rī jeē na jécūhun ni rō jeē tǎjni jínu ni cuu ni rī jecondēhe rí rohó, te nde vijna ná tu cuu. Chi cúní rī scuité núu ga rī jnūhun ya mēhñu ró, nájñūhun ni sáha ri mēhñu ñáyuu tāca gá nación. <sup>14</sup> Chi cúu ri tēe táu siquī jnūhun ya, chi táu rī nacūaha ri jnūhun ya nuū ndihí ñáyuu, cúu ñáyuu jíní gā siquī ndihí jeē iyó ñayīvi jín jéē tu jíní cuiti, cúu ñáyuu tūhva jín jéē tú tūhva. <sup>15</sup> Jeē yúcuan cúu jeē ndihví ni rī jeē suni nuū rohó ñáyuu ñuu Roma nacani ri jnūhun jnáma ya yohó.

*Jeē ndíso jnūhun vāha ya poder*

<sup>16</sup> Chi tu cúcanu rī siquī jnūhun vāha ya, chi yúcuan cúu poder Yaā Dios jeē jnáma ya tāca ñáyuu cá candíje, xīhna gā ñáyuu hebreo te suni tāca gá ñáyuu. <sup>17</sup> Chi jnūhun vāha ya un stéén nuū yō jeē ndáhva Yaā Dios cuēchi yó siquī jeē candíje yó jéē sáha ya jehē yō, te máá jéē candíje yó ní cuáhān yō. Chi súcuan cáhān nuū tútu ii: Ñáyuu jeē ní ndahva yā cuēchi i, técu i jeē candíje i jeē sáha ya jehē i, áchí.

*Siquī jeē iyó ndasí cuēchi ñáyuu*

<sup>18</sup> Chi jíní vāha yó jéē Yaā Dios andiví, cuāha ya castigo xeēn nuū tāca ñáyuu tu cá candíje te máni cuēchi cásáha. Chi jín jniñu néé cásáha i te cájesi i nuū jnūhun ndaā. <sup>19</sup> Te ma cúu cahān i jeē tu jécūhun ni i siquī ndese Yaā cúu Yaā Dios, chi máá yá ni steén nuū i. <sup>20</sup> Chi jín táca jeē ni sáha ya te cúu jécūhun ni ñáyuu ndese Yaā cúu máá Yaā tu jító i nuū. Chi nde ni jecōo ñayīvi jín ndé vijna te cúu jécūhun vāha ni i jeē máá yá cúu Yaā Dios te iyó poder yā ní cáni. Te jeē yúcuan má cúu cuiti cahān i jeē tu jíní i jeē iyó yá.

<sup>21</sup> Chi vēsú ni cajini i ndese Yaā cúu ya, te tu ní cáchiñúhún i ya jeē cúu ya Yaā Dios, te ni tu ní nácuatáhú i nuū yā. Chi sa suhva ni nduu i ñayuu cájeni cāhá ni, chi ni candunéé í i, te ni quendō nee ini anuá i. <sup>22</sup> Cácahān i jeē ndichí i, te sa suhva cáacunéé i. <sup>23</sup> Chi ni castóo i Yaā Dios jeē yóhoyo luu cújéhnu, jeē ma cúu cuiti. Te ni cajetáhú i tācá imagen jeē casáha i, jeē cáa nájñūhun tēe cájihī, te suni nde imagen saa jíin cóō jíin quitī cájica ndicúún ndaha.

<sup>24</sup> Te jeē yúcuan ní siaá Yaā Dios i jeē na sáha i tācá jniñu jnéhén jniñu néé jéē cuní i. Te casáha i jniñu néé jíin jnáhan i jeē cúu máá jnúhun canu. <sup>25</sup> Chi tu ní cá candíje i jñūhun ndaā Yaā Dios, chi sa ni cacandíje i jñūhun stáhú. Te cáhīyo yíñúhún i te cáchiñúhún i nuū tāca jéē ni sáha ya, lugar jeē chiñúhún i máá Yaā ni sáha ún, Yaā jeē cánuú cahān yō jeē kujéhnu ya ní cāni. Amén.

<sup>26</sup> Jeē yúcuan ní siaá Yaā Dios i jeē na sáha i tācá jniñu néé jéē cándiyo ni i jeē cúu máá jnúhun canu. Chi nde ñahan ni casama ña modo síhí, te ni quivī ña jíin modo neé. <sup>27</sup> Te suni súcuan tēe ni casiáá de modo chíjñiñu jíin ñahan. Te nde ni nduquijí de ni casáha ndiyī de jíin jnáhan yí de, te tēe jíin tēe ni casáha de jniñu jnúhun canu. Te cándoho de castigo siquī jniñu néé ní casáha de.

<sup>28</sup> Te jeē tu ní cá cūni i cuajnúhún i Yaā Dios, jeē yúcuan ní siaá yā i jeē na cāni néé ni i, te sáha i tācá jniñu jeē tu íyó váha. <sup>29</sup> Te máni máá na jniñu jeē tu íyó ndaā cándihvī ni, te cájica jnéni, casáha jniñu néé, cándiyo ni, cájito uhū jnáhan. Te máni jeē cá cucuésún ni, cájehni ndiyī, cájejnáhan, cástáhú, cáshuhū jnáhan, cásjnúhún siquī jnáhan. <sup>30</sup> Cácahān jñūhun néé síquī jnáhan, cájito uhū Yaā Dios, cá cucujéē ni, cá sándúxí máá, cá sátéyí máá, cájequin costumbre neé, tu cájendetū nuū tatá nuū naná. <sup>31</sup> Te tu cájecūhun cuiti ni, tu squícu jñūhun jéjñūhun, tu íyó máni jíin jnáhan, tu íne cáhnu ni nuū jnáhan, tu

cúndáhú ni jnáhan. <sup>32</sup> Te je cájini vāha i jeē ni sándaā Yaā Dios jeē ñáyuu casáha súcuan, cánuú jnahnú ndetū i. Te vēsú súcuan cájini i, te níni casáha i jniñu néé un, te suni cánujnahán ni i jeē casáha jnáhan i súcuan.

*Ndaā sándaā Yaā Dios* siquī cuéchi

## 2

<sup>1</sup> Núu súcuan te róhó jéē cahán cuēchi siquī jnáhan, núu na-ni ñayuu cúu ró, ma cúu cahán rō jeē tú na cuēchi máá ró. Chi jeē cahán rō cuēchi siquī jnáhan ró cúu jeē ndénehen ró cuéchi siquī maá ró. Chi róhó jéē cahán cuēchi, suni súcuan sáha máá ró cuēchi. <sup>2</sup> Chi jíní yō jeē Yaā Dios, ndaā sáha ya jeē ndóna ya siquī cuéchi ñayuu casáha súcuan. <sup>3</sup> Te róhó jéē cahán cuēchi siquī ñáyuu casáha cuēchi, te suni súcuan sáha máá ró, ¿te á jéni ni rō jeē cácu máá ró quivī ndóna Yaā Dios siquī cuéchi, chí naún? <sup>4</sup> ¿A cújéē ni rō nuū jnúhun jeē yóhoyo vāha ni Yaā Dios jíin ró, jíin jéē iyó paciencia yā jeē tú yachī cuāha ya castigo nuū rō? ¿Te á tu jécūhun ni rō jeē jnúhun jeē yóhoyo vāha ni yā sáha jeē nácani ni rō siquī cuéchi ró? <sup>5</sup> Chi nīhni ni rō te tu nácani ni rō siquī cuéchi ró. Te jeē yúcuan cáyā gā rō castigo siquī rō quivī sáha Yaā Dios juicio, máá quivī jeē cóo ndijin jeē ndaā sándaā yā siquī cuéchi. <sup>6</sup> Chi chunaa yā nuū ná ĩn ná ĩn ñayuu núu ndese jniñu ni casáha i. <sup>7</sup> Te ñayuu jeē tu jécuiñī i jeē sáha i jniñu váha, cuāha ya jnúhun jeē cótecu i ní cání. Chi ndúcú i quivī i nuū ndujéhnu yíñúhún i, nuū ní cání cotecu i. <sup>8</sup> Te quitī ni yā te cuāha ya castigo nuū ñáyuu cujéē ni nuū yā, te cúnihni ni nuū jnúhun ndaā, chi sa nuū jnúhun yacúá yóho jetáhú i. <sup>9</sup> Te tāca ñáyuu casáha jniñu néé, chi nihīn i jnūndóho xeēn te cucuíhyá ndasí ni i, xīhna gā ñayuu hebreo te suni súcuan ñayuu tāca gá nación. <sup>10</sup> Te sa suhva tāca ñáyuu casáha jniñu váha, chí quivī i nuū ndujéhnu

yíñúhún i, te coo ndeyí coo sī ni i, xīhna gā ñayuu hebreo te suni súcuan ñayuu tāca gá nación.

<sup>11</sup> Chi Yaā Dios tu sáha ya cuenta ndese cúu ñin ñin ñayuu, chi inuú sáha ya jíin i. <sup>12</sup> Chi tāca ñáyuu jeē casáha cuēchi, vēsú tu cáyihí i chíji ley jeē ni jéhe ya nuū Moisés, te tu níní ley un te jnahnū ndetū i. Te tāca ñáyuu cáyihí chíji ley Moisés te casáha cuēchi, jíin ley un sándaā yā cuēchi i. <sup>13</sup> Chi tu ndáhva Yaā Dios cuēchi ñayuu jeē maá jéē cúni nahín-ni i jnūhun cáhán ley yā. Chi sa suhva ñayuu squícu jeē cahán ley yā cúu jeē ndáhva yā cuēchi i. <sup>14</sup> Chi ñayuu tācá nación jeē tu cánevāha tutu ley jeē ni jéhe ya nuū ñáyuu hebreo, te núu cásquícu máá i ley yā, suu cúu jeē cánevāha i ley yā ini anuá i, vēsú tu cánevāha i tutu ley un. <sup>15</sup> Te súcuan cástéén i jeē jnūhun ndácu ley un chí ñūhun ini anuá i. Te tāca jéē cájeni ni i jíin ánuá i, suu cúu jeē steén nuū i síquī núu ni sáha i cuēchi chí váha ni sáha i. <sup>16</sup> Te súcuan coo máá quíví jeē jíin Jesucristo sándaā Yaā Dios síquī tāca jéē tu íyó váha jeē ní cajeni sáhi ni tāca ñáyuu. Súcuan cáhán jnūhun vāha ya jeē nácani ri.

Síquī jeē tu cásquícu ñayuu hebreo ley Moisés

<sup>17</sup> Te róhó cácahān rō jeē téé hebreo cácuu ró, te cátenuū rō maá ley Moisés, te cácutéyí ró jeē síquí Yaā Dios. <sup>18</sup> Te cájeni ni rō jeē jiní rō ndese nújnahan ni yā, jíin jéē cúu nácāji vāha ró ndé-ni cúu jniñu vāha, chí ni cacutūhva ró ley un. <sup>19</sup> Te cájeni ni rō jeē maá ró cácuu tēe stéén ichi Yaā Dios nuū ñáyuu tu cájini cuiti, jíin jéē cúu sáha ró jéē cúndijin ini anuá ñayuu cájica nájñūhun nuū néē. <sup>20</sup> Te cájeni ni rō jeē cúu stéén rō nuū ñáyuu tú tūhva jnūhun ya, jíin jéē maá ró cácuu maestro nuū ñáyuu tu jécūhun ni. Chi jíin tutu ley yā te cájini rō ndese cúu jnūhun ndíchí jnūhun ndaā, cájeni ni rō. <sup>21</sup> Núu súcuan te máá ró jeē castéén nuū ñáyuu, ¿te naun tu cástéén rō

nuū maá ró? Te máá ró jeē cácahān jeē ma sácuihná i, ¿te naun cásacuihná máá ró? <sup>22</sup> Te máá ró jeē cácahān jeē ma cósiquí ndēē i, ¿te naun cásiquí ndēē maá ró? Te máá ró jeē cácahān jeē cácuquini ni rō ídolo, ¿te naun cásacuihná ró ndajniñu jeē yúcu ini vehe ídolo? <sup>23</sup> Te cácutéyí ró jíin ley Yaā Dios, te vēsú súcuan te cásáha ró jēē cácahān ñayuu siquī yā, chi tu cásquícu máá ró jñūhun ndácu ley yā ún. <sup>24</sup> Chi súcuan yósó núū tútu ii: Ñayuu tāca gá nación, máni cácahān ndevāha i siquī Yaā Dios, jeē siquí cuéchi róhó ñayuu hebreo.

<sup>25</sup> Te núu cásquícu ró ley Moisés, yūcuán na te níhín jniñu ndije jeē ní canihīn rō jnunī circuncidar. Te núu tu cásquícu ró ley un, te vēsú ni cuu ró circuncidar, te nájñūhun jeē tu ní cúu ró. <sup>26</sup> Te tēe tācá nación, núu cásquícu de jniñu ndácu ley un, vēsú tu ní cānihīn de jnunī circuncidar, núu súcuan te nájñūhun ni canihīn de jnunī circuncidar. <sup>27</sup> Te tēe jeē tu ní cúu circuncidar yiquí cúñu de, te cásquícu de ley yā, máá de cahān cuéchi siquī rō. Chi tu cásquícu ró, vēsú cánevāha ró tutu ley un, te ni cuu ró circuncidar. <sup>28</sup> Chi nasūu jēē cáa ichi síquí ñn tēe sáha jeē cúu ndije de tēe hebreo. Te ni nasūu jēē cúu circuncidar yiquí cúñu ñn tēe sáha jeē cúu de tēe ndaā. <sup>29</sup> Chi sa suhva tēe cúu hebreo ndije, cúu jeē ini anuá de ñūhun jñūhun ndaā. Te tēe cúu circuncidar ndije, chi nde jíin ini jíin ánuá de sáha de jniñu ndaā te nasūu jēē ndíso de jnunī circuncidar jeē cahán ley un cúu. Tēe cándāa súcuan, nasūu ñayuu cájejnūhún i de, chi máá Yaā Dios.

### 3

<sup>1</sup> ¿Núu súcuan te na vé iyó gá nuū ñayuu hebreo jeē quéndōo vāha ga i? ¿Te ndé níhín jniñu jeē casáha i circuncidar? <sup>2</sup> Vāha ndasí níhín jniñu. Xihna gā nihín jniñu jeē ni jéhe Yaā Dios jñūhun ya nuū maá i. <sup>3</sup> Te vēsú

sava i tu ní cácanđije, ¿te á suu sáha jeē ma squícu ga Yaā Dios jnūhun ni jejnūhun ya, chí naún? <sup>4</sup> Tú cuiťi jeē súcuan, chí vēsú núu ndíhi ñayuu castáhú i, te Yaā Dios chí íyó ndáā yā. Chí suhva yósó nuū tútu īi jeē ni cáhān ĩn tēe jíin yá:

Cahān ñayuu jeē íyó ndáā ni jíin táca jnúhun cáhān ni, te cuni i jeē íyó ndáā ní vēsú núu cácahān i siquī ní. Achí tutu.

<sup>5</sup> Te cácahān sava ñayuu jeē íyó váha jeē sáha yó cuēchi, chí cuēchi yó jéjníñu stéén jeē íyó ndáā Yaā Dios. Núu súcuan ¿te á cuu cahān yō jeē tú vāha sáha Yaā Dios jeē jéhe ya castigo núu jéjníñu cuēchi yó súcuan? (Va cáhān-ni nde ri nájñūhun cácahān ñayuu ñayīví.) <sup>6</sup> Tú cuiťi jeē súcuan. Chí núu jeē tú vāha sáha Yaā Dios, ¿te ndese cuu sándaā yā cuēchi ñayuu ñayīví?

<sup>7</sup> Te núu jnūhun stáhú cácahān ñayuu jéjníñu stéén jeē yóhoyo cújéhnū Yaā Dios siquī jeē máni cáhān ndaā yā, ¿te á cuu cahān yō jeē tú vāha jeē cahān yā jeē cuēchi cúu jeē castáhú i? <sup>8</sup> Tuú, chí núu jeē súcuan cúu, te cuu cahān yō jeē vetū-ni sáha yó jéē neé návāha quee jeē váha núú. Te sava ñayuu cácahān ndevāha i siquī rī jeē súcuan cástéén rī, te tú ndaā. Ñayuu ún chí íyó váha jeē ndénehen ya cuēchi siquī i.

### *Nđivii yō íyó cuēchi*

<sup>9</sup> Núu súcuan ¿te á váha ga ñayuu cácuu yóhó ñáyuu hebreo vēsú inga ñayuu naún? Tú cuiťi jeē súcuan. Chí je ni cacahān yō jeē vēsú ñayuu hebreo chí ñáyuu tāca gá nación, ndivii yō yłhi chíji cuēchi. <sup>10</sup> Chí suhva cáhān tutu īi:

Tú cuiťi na ñayuu ndaā íyó, ni ĩn i.

<sup>11</sup> Te tú cuiťi ñayuu jécūhun ni íyó, te tú ni ĩn i nánducú i Yaā Dios.

<sup>12</sup> Nđihí i ni cascuíta i jnūhun ya,

te inuú-ni ni castívi ndíhi i máá i.

Te tú cuiṭi ñayuu sáha jniñu váha íyó, ni ñin i.

<sup>13</sup> Yaū sucūn i cúu nájnūhun yaū ndīyi jeē núne,

chi máni jnūhun stáhú cácahān i.

Te nájnūhun veneno coō yíhi yuhu i,

<sup>14</sup> chi máni máá jnúhun ndevāha jnūhun uvuā cácahān i.

<sup>15</sup> Te yóhoyo ñama jehē i jeē cáhni i ndīyi.

<sup>16</sup> Te ndé-ni cúu-ni nuū cájica i te squívi i jnūndóho jeē jnahnú ndetū ñayuu.

<sup>17</sup> Te tu cájica cuiṭi i jíin jnúhun coyūcu máni i,

<sup>18</sup> te ni tu cánacani ni i jeē cónso íyo i nuū Yaā Dios.

Achí tutu.

<sup>19</sup> Te jíni yō jeē tāca jnúhun cáhán ley jenahán, chi cáhán nuū ñayuu yíhi chíji ley un, návāha ndíhi i ma cúu cahān i jehē i. Chi ndenehen Yaā Dios cuēchi siquī i nde jíin ñayuu ní ñáyiví. <sup>20</sup> Chi tú ni ñin ñayuu quendōo ndaā i nuū yā jeē nducú i squícu i jniñu ndácu ley un. Chi ley un jéjníñu máni návāha cuni yō jeē iyó cuēchi yó.

*Jeē jnáma ya yohó* síquī jeē candíje yó jéē sáha ya jehē yō

<sup>21</sup> Te vijna te je cájini vāha yó ndese ndáhva Yaā Dios cuēchi yó. Te nasūu ley un sáha jeē quendōo ndaā yō, vésú maá tutu ley jíin téé ni canacani jnūhun ya, ni cacahān ndese ndáhva yā cuēchi ñayuu. <sup>22</sup> Chi tāca ñayuu jeē cácaandíje i jeē ni jíhi Jesucristo jeē chúnaa yā cuēchi i, chi ndahva Yaā Dios cuēchi i siquī jeē súcuan cácaandíje i. Chi inuú-ni cúu tācá ndíhi ñayuu. <sup>23</sup> Chi ndíhi yó ni casáha cuēchi, te jeē yúcuan tu ní cúu quendōo ndaā yō nuū Yaā Dios. <sup>24</sup> Te siquī jeē yóhoyo vāha ni Yaā Dios, jeē yúcuan ndáhva yā cuēchi yó súcuan-ni. Chi siquī jeē ni jíhi Cristo Jesús cúu jeē jnáma ya yohó. <sup>25</sup> Chi Yaā Dios ni jeni ya Cristo návāha socō yā maá yá chunaa yā cuēchi yó jéē ni jíhi yā. Te jnáma ya yohó núu súcuan cácaandíje



yó. Te súcuan ni sáha Yaā Dios návāha stéén yā jeē Yaā ndaā cúu ya. Chi ichi yátá ni īyo paciencia yā, te tu ní chíhi ya cuenta cuēchi ñayuu. <sup>26</sup> Te tiempo yáha stéén yā jeē Yaā ndaā cúu ya, chi ndaā sáha ya jeē squéndōo ndaā yā ñayuu candíje vēsú íyó cuéchi i, chi cá candíje i jeē ní chunaa Jesús cuēchi i ni ndahva yā.

<sup>27</sup> Núu súcuan ¿te á cuu cutéyí gá yō síquī maá yó? Ma cúu cuiṭi, chi ma cúu cutéyí yó caní ni yō jeē vāha squícu yó ley yā. Chi jnáma ya yohó máá síquī jeē candíje yó jéé sáha ya jehē yō. <sup>28</sup> Núu súcuan te je jíní yō jeē ndáhva Yaā Dios cuēchi yó síquī jeē súcuan cándíje yó, te nasūu jéé nducú yó squícu yó jéé ndácu ley.

<sup>29</sup> ¿Te á núu maá-ni ñayuu hebreo cúu ya Yaā Dios, chí naún? Tuú, chi suni cúu ya Yaā Dios jeē jnáma ñayuu tāca gá nación. <sup>30</sup> Chi ñn-ni Yaā Dios iyó, te ndáhva yā cuēchi ñayuu cá candíje jeē ni sáha ya jehē i, cúu ñayuu ndíso jnūnī circuncidar, cúu ñayuu jeē tuú. <sup>31</sup> Te jeē candíje yó jéé jnáma ya yohó, ¿á sáha jeē tuá jíní nūhún squícu yó ley yā, chí naún? Tú cuiṭi, chi sa suhva sáha jeē váha ga cuu squícu yó ley yā.

*Abraham cúu* ñn ejemplo nuū yō

#### 4

<sup>1</sup> Núu súcuan ¿te ndese cahān yō síquī tāca jéé ní cuu jíní jí yō Abraham? ¿Ndese ni ndahvā cuēchi de? <sup>2</sup> Nasūu jéé ni sáha máá de cúu jeē ní ndahva Yaā Dios cuēchi de. Chi núu jeē súcuan cúu núu, te cuu cutéyí de jeē váha ni sáha de. Te tu ní cutéyí de, chi nasūu síquī jeē ni sáha máá de cúu jeē ní ndahva Yaā Dios cuēchi de. <sup>3</sup> ¿Chi ndese cáhán tutu īi? Cáhán jeē ní candíje Abraham jeē sáha ya jeē ni jéjnūhun ya nuū de, te jeē yúcuan ní ndahva yā cuēchi de. <sup>4</sup> Te ñn ñayuu sájniñu, te yāhu i chi nasūu jéé cútahū i cúu, chi jeē chúnaa yō nuū i cúu. <sup>5</sup> Te jeē jnáma

Yaā Dios ñayuu, chi jeē cútahū i cúu. Chi vēsú tu cúu squícu i tācá jniñu váha, te núu candíje i jeē jnáma ya i nuū cuēchi i, yūcuán na te ndahva yā cuēchi i. <sup>6</sup> Te David suni ni cahān de ndese yōhyo ndetū ñayuu jeē ndáhva Yaā Dios cuēchi i, vēsú tu cúu sáha i ni ñn jniñu jeē quéndōo ndaā i nuū yā. <sup>7</sup> Chi ni cahān de:

Nacā ndetū ñayuu jeē íne cáhnu ni yā nuū jniñu néé ni sáha i,  
te tu ndénehen ya cuēchi siquī i.

<sup>8</sup> Te nacā ndetū tēe jeē tuá chíhi máá Jítóho yō cuenta cuēchi de.

Achí tutu.

<sup>9</sup> ¿Te á máni máá ñáyuu squícu ley circuncidar cúu jeē quéndōo ndetū? ¿Chí suni quéndōo ndetū ñayuu jeē tu cúu circuncidar naún? Suni máá i quéndōo ndetū i. Chi je ni cahān yō jeē ní candíje Abraham jeē sáha ya jeē ni jéjnūhun ya, te jeē yúcuan ní ndahva yā cuēchi de. <sup>10</sup> Te ná ni ndahva yā cuēchi de, ¿á je ni cuu de circuncidar, chí ndé ná tuú? Nasūu jéē jé ni cuu de circuncidar, chi nde ná tuú. <sup>11</sup> Te cuéé gá te ni nihīn de jnuni circuncidar. Te suu ni cuu ñn seña, nájnūhun ñn sello jeē ní ndahva yā cuēchi de siquī jeē súcuan ni candíje de. Te jeē yúcuan ní cahān yā jeē cuu de jíí nuū tāca ñáyuu jeē candíje i jeē sáha ya jehē i, suni nuū ñáyuu tu ní cúu circuncidar, chi suni ndahva yā cuēchi máá i. <sup>12</sup> Te suni cúu de jíí nuū ñáyuu ní cuu circuncidar, te nasūu máni jeē ní cuu i circuncidar, chi suni jeē ní jni i ejemplo de. Chi cá candíje i jeē sáha ya jehē i, nájnūhun ni candíje máá de nde ná tu cuu de circuncidar.

*Núu candíje yó te sáha Yaā Dios jeē ni jéjnūhun ya*

<sup>13</sup> Chi ni jejnūhun Yaā Dios nuū Abraham jíin núu tāca yúcūn de jeē cuāha ya ní ñáyiví cuu tahū de. Te nasūu síquī jeē ní nducú de squícu de ley yā cúu jeē ní jejnūhun

ya un núu de, chi sa suhva siquī jeē ní candíje de jeē ni jéjnūhun ya, te ni ndahva yā cuēchi de. <sup>14</sup> Chi núu jeē máni máá ñáyuu nducú squícu ley cúu jeē nihín jeē ni jéjnūhun ya, núu súcuan te cándíje cāha yó nuú, te ma nihín jníñu jeē ni jéjnūhun ya ún. <sup>15</sup> Te ley chi sáha jeē nihín ñayuu castigo siquī jeē tu cúu squícu i. Te núu jeē tu ley, te suni tú na jnūhun stívi ñayuu siquī ley coo núú.

<sup>16</sup> Núu súcuan te ni jejnūhun ya jeē sáha ya jeē váha jíin ñáyuu siquī jeē candíje i jeē súcuan sáha ya, te jeē cútahū i súcuan-ni cúu. Te jeē ni jéjnūhun ya ún, íyó cutú nuū tāca yúcūn Abraham, te nasūu núu maá-ni ñayuu jeē nducú squícu ley jenahán, chi suni nuū tāca ñáyuu cáncandíje nájnūhun ni candíje Abraham. Te súcuan cúu de jíi nuū tāca yó jeē cáncandíje yó. <sup>17</sup> Súcuan ni sáha Yaā Dios chi ni candíje de jeē sáha ya. Chi súcuan cáhán tutu ii: Ni jeni ri rohó cuu ró jíi nuū cuehē ndasí ñáyuu. Súcuan ni cahān maá Yaā jeē nastécu ndīyi te cáhán yā ndese coo tāca jée ná tu coo.

<sup>18</sup> Te ni candíje de, te ni cocuhun teyí ni de jeē ni jéjnūhun ya jeē coo cuehē yucūn de, vēsú tuá na modo coo sēhe de núú. Te jeē yúcuan ní nduu de jíi nuū cuehē ndasí ñáyuu, nájnūhun ni cahān Yaā Dios: Súcuan nducuehē yucūn rō, achí yá jíin de. <sup>19</sup> Te je yajni jinū de ciento cuiyā, te vēsú súcuan te tu ní quénda de nuū jnúhun cándíje de, vēsú jiní de jeē maá de jíin ñasihí de Sara je jéhnu ndasí ndindúu de jeē ma cúu ga coo sēhe de. <sup>20</sup> Te tu ní nácani siquí ni de jeē ma cándíje ga de jnūhun ní jejnūhun Yaā Dios jeē coo sēhe de. Chi sa suhva ni candíje nihin ga de, te ni nacuatáhu de nuū Yaā Dios. <sup>21</sup> Chi ni cucáhnu vāha ni de jeē cúu squícu Yaā Dios ndíhi jeē ni jéjnūhun ya. <sup>22</sup> Te jeē yúcuan ní ndahva yā cuēchi de siquī jeē súcuan ni candíje de.

<sup>23</sup> Te nasūu máa-ni siquī Abraham cúu jeē yosó núu tútu

jeē ní ndahva yā cuēchi de jeē ní candíje de. <sup>24</sup> Chi suni yósó jéē síquí yohó jíjnáhan yó. Chi suni ndáhva yā cuēchi máá yó jéē candíje yó jéē cúu ya Yaā ní nastécu Jitoho yō Jesús. <sup>25</sup> Chi ni jihī Jesús jeē chúnaa yā cuēchi yó, te ni natecu yā návāha ndahva Yaā Dios cuēchi yó.

*Ndese quéndōo ñayuu jeē ndáhva yā cuēchi*

## 5

<sup>1</sup> Núu súcuan te je ni ndahva Yaā Dios cuēchi yó síquí jeē ní candíje yó jéē sáha ya jehē yō. Te jeē yúcuan ní sáha ya jeē ní ndāví yó núu jnúhun manī yā jíín yó, síquí jeē ni jíhī Jitoho yō Jesucristo jehē yō. <sup>2</sup> Chi máá Cristo ni sáha jeē ni quívicoo yó núu Yaā Dios, chi ni sáha ya jeē váha yóhó síquí jeē súcuan cándíje yó. Te cáhīin nīhin yó jíín jnúhun jeē sáha ya jeē váha yóhó. Te cúshī ni yō chi ñúhun ni yō jeē jinú yō nuū lúu kujéhnú yó jíín Yaā Dios. <sup>3</sup> Te nasūu máá yáha-ni, chi suni cúshī ni yō jeē ndóho yó jnúndóho. Chi jííní yō jeē maá jnúndóho sáha jeē jéndeyí ni yō. <sup>4</sup> Te jeē jéndeyí ni yō sáha jeē íje vāha yó cuu yó ñáyuu ndaā. Te jeē íje vāha yó sáha jeē ñúhun ni yō tāca jéē váha jeē cóo. <sup>5</sup> Te tāca jéē ñúhun ni yō, chi nihīn nahín yó. Chi jnúhun cúndáhú ni Yaā Dios yohó, ni cunuú ini anuá yō, sáha Yaā Dios jeē jíín Espíritu Santo jeē ni jéhe ya nuū yō.

<sup>6</sup> Chi náa ndóho yó jéē ma cúu cuítí jnama yó máá yó, te ni jihī Cristo jehē yohó jéē cúu yó ñáyuu íyó cuēchi. Te ni jihī yā maá quíví jeē jé ni jeni Yaā Dios. <sup>7</sup> Te yíí cúu jeē cúu ñin ñayuu jehē ñnga ñayuu, vésú jehē ñin ñayuu ndaā. Chí sanaa te íyó jínu jeē chúndeyí ni ñin tēe cuu de jehē ñin tēe ndaā vāha. <sup>8</sup> Te máá Cristo chi ni jihī yā jehē yō náa máni cuēchi sáha yó, te súcuan ni steén Yaā Dios jeē cundáhú ni yā yohó. <sup>9</sup> Te vijna je ni ndahva Yaā Dios cuēchi yó síquí jeē ni jíhī Cristo jehē yō. Núu súcuan te suni jííní vāha yó jéē jnama Cristo yohó núu castigo quiji

quívī sáha Yaā Dios juicio. <sup>10</sup> Chi náa cúu ga yō enemigo Yaā Dios, te siquī jeē ni jhī Sēhe ya jehē yō, te ni sáha ya jeē ndívi yó núū jnúhun manī yā jíin yó. Te jeē súcuan ní ndívi yó nuū jnúhun manī yā jíin yó, te suni jíní vāha yó jéē cācu yó síquī jeē técu Cristo, nduú yá jíin yó. <sup>11</sup> Te nasūu máá yáha-ni, chi suni cúsiī ndasí ni yō jíin Yaā Dios siquī jeē ni sáha Jitoho yō Jesucristo jehē yō, chi máá yá ni sáha jeē ní ndívi yó núū jnúhun manī Yaā Dios jíin yó.

### *Jnúhun Adán jíin jnúhun Cristo*

<sup>12</sup> Núu súcuan te jíní yō jeē ni quívi cuēchi ini ñayīvi ní sáha máá ñn-ni tēe Adán. Te jeē síquí cuēchi yúcuan te ni jecōo cuehyī jéhni ñayuu. Te jeē yúcuan cúu jeē jihí ndíhi ñayuu, chi ndíhi i yíhi cuēchi. <sup>13</sup> Te nde ná tu cuāha ya ley nuū Moisés, te je íyó cuēchi ini ñayīví. Te siquī jeē ná tu coo ley yā, te tu ní chíhi ya cuenta jeē castívi i. <sup>14</sup> Te vēsú súcuan te nde tiempo Adán te nde tiempo Moisés ni yíhi ñayuu chíhi cuehyī jeē jéhni i síquī jeē iyó cuēchi i. Chi ni jihí i síquī cuēchi ní casáha máá i, vēsú tu ní sáha i jnáhan cuēchi jeē ni sáha Adán jeē ní cunīhni ni de nuū ñn jniñu ní ndacu ya. Te Adán ni cuu de ñn muestra maá Yaā ní quiji cuéé gá.

<sup>15</sup> Te jnúhun jeē ni sáha Adán cuēchi, tu quíjnáhan cuítì jíin táhū jeē jnáma Yaā Dios yohó. Chi jeē ni stívi máá ñn-ni tēe ún, jeē yúcuan cúu jeē jihí ndíhi yó. Te jnúhun jeē jnáma Yaā Dios yohó cújéhnu ndasí gá, chi siquī jeē ni sáha máá ñn-ni tēe Jesucristo cúu jeē súcuan-ni jnáma ya ndíhi ñayuu candíje. <sup>16</sup> Te cuēchi jeē ni sáha máá ñn-ni Adán, tu quíjnáhan cuítì jíin jnúhun jeē jnáma Yaā Dios yohó. Chi siquī máá ñn-ni cuēchi ún te ni quívicoo ñayuu chíhi jnúhun jnahnū ndetū i. Te jnúhun jeē jnáma ya ñayuu, sa suhva sáha jeē súcuan-ni ndáhva yā cuēchi i, vēsú yōhyo cuehē cuēchi ni casáha i. <sup>17</sup> Chi siquī jeē ni

sáha máá ñn-ni tēe Adán cuēchi, te ni nihīn poder cuehyi jéhni ñayuu. Te sa suhva siquī jeē ni jīhī maá ñn-ni tēe Jesucristo, te víhyá gā ni nihīn ñayuu maá yá poder jeē cótecu i caca ndaā i jíin yá. Chi ni ndahva yā cuēchi i siquī jeē yóhyo vāha ni yā.

<sup>18</sup> Núu súcuan te siquī jeē ni sáha máá ñn-ni tēe Adán cuēchi, te ni quīvicoo ndīhi ñayuu chíji jnūhun jnahnū ndetū i. Te sa suhva siquī jeē ni sáha máá ñn-ni tēe Jesucristo ñn jniñu váha ndasí, te ndáhva Yaā Dios cuēchi ndīhi ñayuu te cotecu i ní cání. <sup>19</sup> Chi siquī jeē tu ní jéndije máá ñn-ni tēe, te ni quīvicoo cuehē ndasí ñáyuu chíji cuēchi. Te suni súcuan siquī jeē ní jéndije máá ñn-ni tēe Jesucristo, te ndáhva Yaā Dios cuēchi cuehē ndasí ñáyuu.

<sup>20</sup> Te ni jēhe ya ley yā návāha cuni yō jeē cuéhē cuēchi cásáha yó. Te jeē ní nducuehē cuēchi yó, te víhyá gā cuehē cúu jnūhun jeē váha ni yā jeē íne cáhnu ni yā nuū yō.

<sup>21</sup> Núu súcuan te nájñūhun ni nihīn poder cuehyi jéhni ñayuu siquī jeē iyó cuēchi i, suni súcuan íyó poder jnūhun jeē váha ni yā jíin yó. Chi ndáhva yā cuēchi yó te cotecu yō ní cání siquī jeē ni jīhī Jitoho yō Jesucristo jehē yō.

*Jeē tuá yíhi yó chíji cuēchi chi yíhi yó ndaha Cristo*

## 6

<sup>1</sup> Núu súcuan ¿te ndese cahān yō? ¿A caca ga yō jíin cuēchi návāha víhyá gā sáha ya jeē váha yóhó jēe cóne cáhnu ni yā nuū yō? <sup>2</sup> Ma cúu cuíti. Chi nájñūhun je ni jíhī yō jeē tuá yíhi yó chíji cuēchi, te ma cúu ga caca yó jíin cuēchi núu súcuan. <sup>3</sup> ¿A tu cájecūhun ni rō jeē tāca yó jeē ní jendute yó síquī jeē ni quívi yó ndaha Cristo Jesús, suni ni jendute yó síquī jeē ni quívi yó chíji jnūhun jeē ni jíhī yō jíin yá? <sup>4</sup> Chi jeē ní jendute yó cúu nájñūhun ni quindūji yó jēe ni jíhī yō jíin yá. Te vijna te cuu caca yó jíin

vida jeé jeē ni jéhe ya nuū yō, chi nájnūhun suni ni natecu yō jíin yá. Chi ni natecu yā ni sáha Tátá yā jíin poder jeē cujéhnū ndasí yá.

<sup>5</sup> Chi núu ni cundúú yó jíin yá siquī jnúhun jeē ni jhī yō jíin yá, te suni súcuan cundúú yó jíin yá siquī jnúhun jeē ní natecu yō jíin yá. <sup>6</sup> Chi jíní yō jeē ní naa modo maá yó jeē ni jíca yó jíin ichi yátá, chi ni quīvi yó núu jnúhun jeē ni jhī yō jíin Cristo jicā cruz. Te súcuan ni naa modo yō jeē cúu yó mozo nuū cuéchi, návāha tuá cuajníñu yó núu tācá jniñu jeē máni cuéchi cúu. <sup>7</sup> Chi ñayuu jeē jé ni cajihī, je ni quendacoo i chíji tāca cuéchi. <sup>8</sup> Te núu je ni jihī yō jíin Cristo, te cándije yó jéē suni súcuan ni natecu yō jíin yá. <sup>9</sup> Chi jíní yō jeē ní natecu Cristo, te ma cúu cuiñi ga yā, chi cuehyī jéñi yóhó, tuá na vé cúu sáha jíin yá. <sup>10</sup> Chi jeē ni jhī yā, te ñin jínu-ni ni jihī yā jeē siquí cuéchi ñayuu. Te jeē técu yā vijna, chi sáha ya jeē cuní Yaā Dios. <sup>11</sup> Te suni súcuan róhó jíjnáhan ró, sáha ró cuenta jeē nájnūhun ni cajihī rō jeē ní quendacoo ró chíji cuéchi. Te cátecu rō návāha sáha ró jéē cuní Yaā Dios, chi ndúú ró jíin Jítóho yō Cristo Jesús.

<sup>12</sup> Núu súcuan te ma cuáha ga rō jnūhun quiñi ró chíji cuéchi jíin yiquí cúñu rō jeē cúu. Chi cuéchi ún stíhví ni rohó jéē na sáha ró táca jéē ndíyo néé ni rō. <sup>13</sup> Te ma cuáha ró máá ró cuajníñu ró núu cuéchi jeē cócuu ró jíin jniñu néé. Chi sa suhva cuāha ró máá ró nuū Yaā Dios, te sáha ró cuenta jeē nájnūhun je ni cajihī rō te ni canatecu rō nuū yā. Te cuāha ndiñi ró máá ró nuū yā jeē cuajníñu ró núu jniñu ndaā. <sup>14</sup> Chi tuá na poder cuéchi jeē cundeyí jíin ró, chi tuá cáyihí ró chíji ley jenahán, chi sa cáyihí ró chíji jnūhun jeē váha ni yā jíin ró.

*Jnūhun mozo jeē steén ndese quéndōo ñayuu cácan dije*

<sup>15</sup> ¿Ndese sáha yó núu súcuan? ¿A caca ga yō jíin cuéchi siquī jeē tuá yíhi yó chíji ley jenahán, chí sa yíhi yó chíji jnūhun jeē váha ni yā jíin yó? Ma cúu cuiṭi. <sup>16</sup> Chi cájini rō jeē núu cuāha ró máá ró jeē cuatáhú ró sájniñu ró núu ññ tēe, núu súcuan te cácuu ró mozo nuū téé ún, te cánuú cuandije ró núu de. Te suni súcuan núu cuāha ró máá ró jeē sáha ró cuéchi, te mozo cuéchi cácuu ró, te cuu rō. Te núu cuatáhú ró nuū maá yá, te mozo yā cácuu ró jéé cáca ndaā rō. <sup>17</sup> Te na cútahū yō nuū Yaā Dios, chí vēsú ni cacuu ró mozo nuū cuéchi, te vijna chí nde jíin ini jíin ánuá rō ni cajetáhú ró nuū jnúhun ya jeē ní quívicoo ró núu. <sup>18</sup> Te vijna te je ní nduu libre rō jeē tuá cácuu ró mozo nuū cuéchi, te cájejniñu ró núu jniñu ndaā. <sup>19</sup> (Ni cahān rī ññ jnūhun ndese cúu siquī mozo ini ñayīvi yáha, chí tu cájecūhun yachī ní rō siquī jnúhun ya.) Núu súcuan te nájnūhun ní cajēhe ró máá ró nde saá jeē ní cajejniñu ró núu tācá jniñu jnéhén jniñu néé, suni súcuan cuāha ró máá ró vijna jeē cuajniñu ró núu jniñu ndaā, návaha coo ndoo coo ññ rō nuū Yaā Dios.

<sup>20</sup> Chi nde náa cácuu ró mozo nuū cuéchi, te tu ní cájejniñu ró núu jniñu ndaā. <sup>21</sup> ¿Te na vé ní canihīn rō siquī cuéchi ní casáha ró un jéé cácuu rō vijna sáha? Tú cuiṭi, chí máá jéé jnahnú ndetū rō níí cáni sáha. <sup>22</sup> Te vijna te je ní canduu libre rō jeē tuá cácuu ró mozo nuū cuéchi, te cájejniñu ró núu Yaā Dios. Te suu sáha jeē quéndō vāha ró, chí cáhiyo ndoo cáhiyo ññ rō nuū yā, te nde sandīhí te cotecu rō níí cáni. <sup>23</sup> Chi yāhu jeē nihín ñayuu siquī cuéchi cúu jeē jnahnú ndetū i. Te sa tahū jeē jéhe Yaā Dios cúu jeē cótecu yō níí cáni andiví, siquī jeē nduú yó jíin Jítoho yō Cristo Jesús.

*Jnūhun ñnasíhí jíin yñ jeē steén ndese quéndō ñayuu cácadíje*



## 7

<sup>1</sup> Hermano, je cájini rō ndese cáhán ley yā, te cájini rō jeē yíhi ñayuu chíji ley maá-ni núu técu i ñayivi yáha. <sup>2</sup> Te yāha cúu nájnūhun iin ñahan jeē ní quijnáhan, chi cáhán ley jeē yíhi ña ndaha yii ña maá-ni núu técu de. Te núu ni jihī yii ña, te je ni quenda ña chíji ley jeē ní quijnáhan ña jíin de. <sup>3</sup> Núu súcuan te núu quijnáhan ña jíin inga tēe níni técu gā yii ña, te casíquí ndéē ña de. Te núu je ni jihī yii ña, te je ni quenda ña chíji ley un. Te cuu quijnáhan ña jíin inga tēe, chi nasūu jéē casíquí ndéē ña núu súcuan.

<sup>4</sup> Te suni súcuan róhó jíjnáhan ró, ñānī mánī, chi ndúú ró jíin Cristo. Chi nájnūhun ni cajihī rō jíin Cristo, te ni quendacoo ró chíji ley jenahán. Te vijna chi nájnūhun ni quijnáhan ró jíin inga, cúu jeē ní quivicoo ró ndaha Cristo, Yaā ni natecu mēhñu ndíyi, návāha cuu sáha ró jniñu váha jeē cuní Yaā Dios. <sup>5</sup> Chi ná ni cajica yó jíin modo maá yó nde saá, te ley un ní sáha jeē ní ndíyo neé ni yō tāca jéē cuní yiquí cúñu yō jeē sáha yó. Te yūcuan ní sáha jeē jnahnú ndetū yō nuú. <sup>6</sup> Te vijna te je ni quenda yó chíji ley jenahán, chi nájnūhun je ni jihī yō jeē ma nihín gā poder siquī yō. Te súcuan te íyó libre yō jeē cuajniñu yó núu Yaā Dios. Te jíca yó jíin modo jeé jéē cuní maá Espíritu, chi tuá yíhi yó chíji ley jeē ní tee Moisés jenahán.

Siquī cuēchi jeē ñūhun ini anuá yō

<sup>7</sup> ¿Ndese cahān yō núu súcuan? ¿A ley ndíso cuēchi? Tú cuiti jeē súcuan. Te núu jeē tú ley yā, te ma cúni cuiti rī jeē iyó cuēchi rī. Chi ma cúni rī jeē cuēchi cúu jeē ndíyo ni rī ndajniñu jnáhan rī núu tu ní cáhán ley jeē ma ndíyo ni yō. <sup>8</sup> Te súcuan ni nihín cuēchi modo cocuu jíin rí. Chi siquī jeē ndácu ley jniñu jeē ma sáha yó cuēchi, te ni quejéé ndíyo ni rī sáha rī tāca jéē neé. Te núu jeē tu ley, te suni tú na jnūhun stívi yó siquī ley nuú. <sup>9</sup> Chi ni iyo tiempo

jeē técu rī jeē ná tu jecūhun ni rī jeē cahán ley. Te ná ni quejéé rí jécūhun ni rī jniñu jeē ndácu ley, te ni jecūhun ni rī jeē iyó cuéchi ri, te ni nduu ri nájnūhun ndīyi. <sup>10</sup> Chi ni jini rī jeē ley jeē sáha jeē cótecu anuá rī nuú, te tuú chi sa ni sáha jeē jnahnú ndetū rī nuú. <sup>11</sup> Chi jíin jéē ndácu ley un jniñu, te ni nihīn cuéchi modo cocuu jíin rí, te ni stahú ruhū. Chi jíin jéē ndácu ley jniñu, te cuéchi ni sáha jeē ní quenda jnūhun jeē jnahnū ndetū rī.

<sup>12</sup> Núu súcuan te iyó ndáā maá ley, te tācá jniñu ndácu chi iyó ndoo iyó ndáā vāha. <sup>13</sup> Núu súcuan te ley jeē iyó váha ún, ¿á suu sáha jeē jnahnú ndetū rī naún? Tú cuiti. Chi sa suhva máá cuéchi cúu jeē sáha jeē jnahnú ndetū rī, te súcuan stúu cuéchi ndese iyó máá. Chi jíin jniñu váha jeē ndácu ley te ni natūu jniñu néé jéé cúu cuéchi.

<sup>14</sup> Chi jíiní yō jeē nuū maá Espiritu vēji ley. Te ruhū chi sa névāha ri iin modo neé máá rí jeē ni squívi ruhū jejniñu cāha rí nuū cuéchi. <sup>15</sup> Chi tāca jéē sáha ri, tu jécūhun ni rī najehē cúu jeē sáha ri. Chi jniñu váha jeē cuní rī sáha ri, tu ndé níhín rī fuerza sáha ri, chi sa suhva sáha ri jniñu néé jéē tu cúvāha ni rī sáha ri. <sup>16</sup> Te náa sáha ri jniñu néé jéē tu cuní rī sáha ri, núu súcuan te nácuni rī jeē iyó ndáā ley. <sup>17</sup> Núu súcuan te nasūu rúhū cúu jeē sáha jniñu néé un, chi modo neé jéē ñúhun ini anuá rī cúu jeē sáha cuéchi. <sup>18</sup> Chi jíiní rī jeē modo maá rí jeē névāha ri ini anuá rī, tú cuiti na vé jeē váha iyó. Chi cuní rī sáha ri jniñu váha, te tu ndé níhín rī fuerza sáha ri. <sup>19</sup> Chi jniñu váha jeē cuní rī sáha ri, tu sáha ri. Te jniñu néé jéē tu cuní rī, sa yūcuan sáha ri. <sup>20</sup> Te náa sáha ri jniñu jeē tu cuní rī sáha ri, te nasūu rúhū cúu jeē sáha, chi modo neé jéē ñúhun ini anuá rī cúu jeē sáha.

<sup>21</sup> Núu súcuan te ni jini rī jeē súcuan cúu jíin rí: Vēsú cuní rī sáha ri jniñu váha, te sa máni modo neé cúu jeē ñúhun ini anuá rī. <sup>22</sup> Chi cúsiñ ni rī jíin ley Yaā Dios nde

jiín ini anuá rī. <sup>23</sup> Te ni nacuni rī jeē iyó inga modo neé máá rí jeē jési nuū jeē cuní rī sáha ri jeē váha. Te cúu ri nájnūhun preso nuū cuéchi jeē jícu jíín rí.

<sup>24</sup> Nacā jeē ndahú gá cúu ri núu súcuan. ¿Ndé ñn jnama ruhū nuū modo neé máá rí jeē jícu jíín rí jeē jnahnú ndetū rī? <sup>25</sup> Na cútahū ndasí rí nuū Yaā Dios, chi máá yá cúu jeē jnáma ruhū nuū modo neé rí siquī jeē ni jíhī Jitoho rī Jesucristo jehē rī. Núu súcuan te vésú cuní yō squícu yó ley Yaā Dios, te jeē jíín fuerza maá yó ma cúu, chi modo neé máá yó sáha jeē jejniñu cāha yó nuū cuéchi.

Siquī jeē jíca yó jíín modo cuní Espíritu Yaā Dios

## 8

<sup>1</sup> Núu súcuan te ma ndénehen Yaā Dios cuéchi siquī ñayuu cáyihī ndaha Cristo. Chi tuá cájica i jíín modo neé máá i, chi sa suhva cájica i nájnūhun cuní maá Espíritu yā. <sup>2</sup> Chi modo jeē sáha Espíritu cúu jeē técu yō siquī jeē yíhī yó ndaha Cristo Jesús. Te yūcuan ní sáha jeē ní nduu libre yō nuū jnúhun jeē ni yíhī yó chíji cuéchi jeē jnahnú ndetū yō nuú. <sup>3</sup> Chi ni sáha Yaā Dios jeē quéndōo vāha ñayuu jeē tu ní cúu quendōo vāha jíín ley Moisés, siquī jeē tú na fuerza i jíín modo maá i jeē squícu i ley un. Chi ni tají yá Sēhe ya ni quiiji, te ni nduu ya nájnūhun ñayuu cáhīyo cuéchi, návāha socō yā maá yá siquī cuéchi, vésú tú na cuéchi ya. Te súcuan ni ndonda Yaā Dios siquī cuéchi jeē ní casáha ñayuu jíín modo neé máá i. <sup>4</sup> Súcuan ni cuu návāha cuu squícu yó táca jniñu ndaā jeē ndácu ley, chi tuá jíca yó jíín modo neé máá yó, chi jíca yó nájnūhun cuní maá Espíritu.

<sup>5</sup> Chi ñayuu jeē cájica jíín modo neé máá, chi máni ndíhví ni i siquī jeē cuní maá i. Te ñayuu jeē cájica nájnūhun cuní Espíritu, chi máni ndíhví ni i siquī jniñu cuní maá Espíritu. <sup>6</sup> Te jeē ndíhví ni yō siquī modo cuní

maá yó sáha jeē jnahnú ndetū yō. Te jeē ndihví ni yō siquī jniñu cúní maá Espiritu, sa suhva sáha jeē cotecu yō ní cání te coo ndeyí coo sī ni yō. <sup>7</sup> Chi ñayuu jeē ndihví ni siquī modo neé cúní maá i, chi jíto uhū i Yaā Dios, chi tu cúní i cuatáhú i ley Yaā Dios, te ni ma cúu squícu i. <sup>8</sup> Jeē yúcuan, ñayuu jíca jíín modo cuní maá, tu cúu sáha i jeē cúsi ni Yaā Dios jíín i.

<sup>9</sup> Te máá ró jijnáhan ró, chi tuá cájica ró jíín modo cuní maá ró, chi cájica ró nájnūhun cúní Espiritu, chi ndéé Espiritu Yaā Dios ini anuá rō. Te ñayuu jeē tu ndéé Espiritu Cristo ini i, tu cáyihí i ndaha ya. <sup>10</sup> Te núu ndéé Cristo ini rō, te vēsú ñn quivī te cuu yiquí cúñu rō jeē siquí cuēchi, te cotecu anuá rō siquī jeē ní ndahva Yaā Dios cuēchi ró. <sup>11</sup> Te núu ini rō jijnáhan ró ndéé Espiritu maá Yaā jeē ní nastécu Cristo Jesús mēhñu ndíyí, yūcuán na te máá yá suni sáha ya jeē natecu yiquí cúñu rō jeē cúu. Te sáha ya súcuan jeē jíín máá Espiritu yā jeē ndeé ini rō.

<sup>12</sup> Núu súcuan, hermano jijnáhan ró, ndéé jniñu yó jéē caca ndaā yō, te nasūu jéē sáha yó modo neé cúní maá yó. <sup>13</sup> Chi núu caca ró jíín modo neé máá ró, te jnahnū ndetū rō. Te núu jíín fuerza maá Espiritu snāā rō tācá jniñu cásáha ró jíín modo neé máá ró, te cotecu rō ní cání.

<sup>14</sup> Chi tāca ñayuu jeē cándiquīn modo jeē steén Espiritu Yaā Dios, máá i cácuu sēhe Yaā Dios. <sup>15</sup> Chi Espiritu jeē ní canihīn rō, tu ní sáha ya rohó jéē cuu ró nájnūhun mozo nuū yā jeē yūhú tucu ró núu yā, chi sa ni sáha ya jeē cúu yó séhe ya. Te jeē yúcuan cúu jeē cahán jee yó: Tátá maá ná. <sup>16</sup> Te máá Espiritu steén yā ini anuá yō jeē cúu ndije yó séhe Yaā Dios. <sup>17</sup> Te núu sēhe ya cácuu yó, te suni nihīn yō maá táhū jeē ni jéjnūhun ya, te ñn cáhnu-ni coo tahū yō jíín Cristo. Chi núu ndóho yó jíín yá vijna, suni cujéhnu yó jíín yá andiví.

<sup>18</sup> Núu súcuan te sáha ri cuenta jeē tāca jnúndóho jeē ndóho yó vijna, lúli ndasí cúu nuū jnúhun jeē kujéhnú luu yó jíin yá cucuéé gá. <sup>19</sup> Chi ndíhi jeē ni jécōo, yōhyo cándētu jeē na sáha Yaā Dios jeē nduvāha, quivī quenda ndijin jeē kujéhnú sēhe Yaā Dios jijnáhan i. <sup>20</sup> Chi tāca jéē ni jécōo, chi ni quivī chíji jnúhun jeē tu quéndōo vāha. Te nasūu jéē ní castívi máá, chi ñayuu ni casáha cuēchi, te jeē yúcuan ní squéndōo Yaā Dios súcuan. Te máni cándētu jeē ndúvāha. <sup>21</sup> Chi iin quivī te tāca jéē ni jécōo, chi quenda chíji jnúhun jeē tívi jíin jéē tehyú. Te nduluu ndasí nájnūhun coo tāca séhe Yaā Dios, chi cācu nuū jnúhun jeē tu quéndōo vāha. <sup>22</sup> Chi jíin yō jeē tāca jéē ni jécōo, chi nde vijna te nájnūhun inuú-ni cándoho te cájitū ni jeē na ndúvāha ndíhi. <sup>23</sup> Te nasūu máá-ni tāca jéē ni jécōo cúu jeē ndóho, chi suni nde máá yó ndóho yó, vēsú je névāha yó Espíritu jeē cúu seña jeē iin quivī te nihīn yō ndíhi tahū yō. Chi yōhyo ndóho yó jnúndóho, te ndétu yó jéē náquihin séhe ya yohó te jnama ya yiqui cúñu yō jeē tuá ndoho yó jíin. <sup>24</sup> Chi ni jnama ya yohó síquī jeē ñúhun ni yō jeē súcuan coo. Te núu je ni sáha ya nájnūhun ñúhun ni yō, yūcuán na te tuá ñúhun ni yō jeē sáha ya súcuan jíin yó. Chi tuá ndétu yó te núu je ni cuu súcuan. <sup>25</sup> Te núu ná tu coto yó jéē sáha ya jeē ñúhun ni yō, yūcuán na te jíin paciencia ndétu yó jéē sáha ya.

<sup>26</sup> Te suni súcuan máá Espíritu chéndéé ñáhán yá yohó jéē tú na fuerza ini yō. Chi tu jíin yō cacān tahú yō nájnūhun cánuú. Te máá Espíritu cahán ndahú yá jíin Yaā Dios jehē yō síquī tāca jéē jítú ndasí ni yō te tu níhín yō jnúhun ndese cacān tahú yō. <sup>27</sup> Te máá Yaā Dios jeē jító ndee anuá yō, chi jíin yā tāca jéē cuní máá Espíritu cahán yā jehē yō. Chi ñayuu cáyihí ndaha Yaā Dios, cáhán ndahú Espíritu jehē i nájnūhun cuní Yaā Dios.

*Vāha-ni cúndeyí* yó síquī ndīhi jeneé

<sup>28</sup> Te jíni yō jeē tācá-ni jeē quíji nuū ñayuu manī jíin Yaā Dios, jeē váha chí jée uhú, chí quéndōo vāha ga i nuū yā, sáha ya jíin táca jée yúcuan. Chí cácuu i ñayuu jeē ní cana ya i ni quīvicoo i ndaha ya síquī jeē súcuan ni tee ni yā nde jenahán. <sup>29</sup> Chí nde ná tu coo i te je jíni yā i, te je ni jeni ya i jeē ndoo ndaā nduu ánuá i ndacu i máá Séhe ya, návāha na cúu Sēhe ya ñani jéhnú nuū cuehē ñayuu cácuu ñani cácandíje. <sup>30</sup> Te jeē ní jeni ya i, te suni ni cana ya i. Te jeē ní cana ya i, te suni ni ndahva yā cuēchi i. Te jeē ní ndahva yā cuēchi i, te suni ni sáha ya jeē cujéhnú i.

<sup>31</sup> ¿Te ndese ga cahān yō síquī jnúhun jéhnú yáha núu súcuan? Chí núu íne Yaā Dios jíin yó, ¿te ndé ñn cuu cahān síquī yō? Tú ni ñn. <sup>32</sup> Chí máá yá tu ní jnáma ya Sēhe ya jeē ma cúu yā, chí sa suhva ni jēhe ya Sēhe ya ni jihī yā jehē ndīhi yó. Te núu súcuan ni jēhe ya Sēhe ya, te nagā ni cuu jeē ma cuáha ya tāca gá jeē jíni ñúhún yó. <sup>33</sup> ¿Te ndé ñn cuu cahān cuēchi síquī ñayuu jeē ní nacāji Yaā Dios? Tú ni ñn. Chí máá yá ni ndahva yā cuēchi i. <sup>34</sup> ¿Te ndé ñn cuu ndenehen cuēchi síquī yō núu súcuan? Tú ni ñn. Chí máá Cristo cúu jeē ni jíhi yā jehē yō, te suni ni natecu yā. Te vijna te ndéé yá lado váha Yaā Dios nuū cujéhnú ya, te cáhán ndahú yá jíin Yaā Dios jehē yō. <sup>35</sup> ¿Te ndé ñn cuu quenehen yóhó núu jnúhun cúndáhú ni Cristo yohó? ¿A jnúndóho, chí táca jée yí sáha, chí jée cājito xeēn ñayuu yohó, chí jnáma, chí jée cúmanī sahma, chí jnúhun yúhú, chí jée cáhni i yóhó naún? Ni ñn táca jée yáha. <sup>36</sup> Chí súcuan yósó núu tútu ñi jeē cácahān ñayuu cácandíje jíin Yaā Dios:

Jeē síquí máá ní te ndīhi-ni hora cácuni i cahni i sañá.

Te cásáha i jíin ná nájñuhun cásáha i jíin lanchi, quiti cúu. Achí tutu. <sup>37</sup> Te tuú chí vésú cándoho yó táca jée yáha, te vāha-ni cúndeyí yó síquī ndīhi-ni, sáha máá Yaā jeē ní

cundáhú ni yohó. <sup>38</sup> Jeē yúcuan cúcáhnú ni rī jeē tú ni ñin cuu quenehen yóhó núū jnúhun cundáhú ni Yaā Dios yohó. Ni núu cuu yō, ni núu cotecu yō, ni tācá ndajéhé andiví, ni tāca jéē neé jéē cácujuhnu jñí poder, ni jeē iyó vijna, ni jeē cóo, <sup>39</sup> ni jeē iyó núū sūcún, ni jeē iyó núū cūnú, ni tāca gá jeē ní jecōo, ma cúu cuiti quenehen yóhó núū Yaā Dios, jeē jíin Jítóho yō Cristo Jesús ni cundáhú ni yā yohó.

Siqūī ndese ni nacāji ya yucūn Israel

## 9

<sup>1</sup> Te cáhán ndaā rī chi cúu ri tēe cándije Cristo, te tu stáhú rí, te jíiní rī ini anuá rī jeē cahán ndaā rī sáha Espiritu Santo. <sup>2</sup> Yōhyo cúcuíhyá ni rī, te níiní jnáhuñú ni anuá rī <sup>3</sup> jeē siquí tāca jnáhan ri ñayuu nación hebreo, chi ñin-ni yucūn rī jijnáhan ri. Chi jeē siquí máá i te cúu ni rī jeē núu na cúu te cujiyo ri nuū Cristo te jnahnū ndetū rī, návaha jíin yúcuan te cuu cācu ánuá máá i núú. <sup>4</sup> Chi cácuu i yucūn ñayuu Israel, te nde jenahán ni sáha Yaā Dios jeē cúu i sēhe ya, te mēhñu vícō jeē ndíndēé ní condee yā jíin i sáá. Te jíin máá i ni sáha ya tācá contrato, te ni jēhe ya ley yā nuū Moisés jeē cúu máá i, te ni steén yā ndese chinúhún i ya ini templo, te nuū máá i ni jejnūhun ya cuehē jnúhun. <sup>5</sup> Te máá i cácuu yucūn tāca jíi yō jeē ní cacujéñu, te suni yucūn máá i ni cacu Cristo jeē ní nduu ya tēe. Te máá yá cúu Yaā Dios jeē jñí ndíhi-ni, te ní cání cahán ñayuu jeē cujéñu ya. Amén.

<sup>6</sup> Te nasūu jéē tu ní quée ndaā tāca jnúhun jeē ni jéjnūhun Yaā Dios nuū ñayuu Israel. Chi ni quee ndaā nahín núū vēsú jecu-ni i, chi tú ndíhi-ni yucūn Israel cúu jeē cácandije. <sup>7</sup> Chi nasūú ndíhi yucūn Abraham cácuu ndije sēhe de jeē ni jéjnūhun ya. Chi ni cahán Yaā Dios jíin de: Nuū máá-ni sēhe ró Isaac cúu nuū coo yucūn rō jeē ni

jéjnūhun ri nuū rō. <sup>8</sup> Te jnūhun yáha cúní cahān jeē ni ĩn ñayuu tu cúu i sēhe Yaā Dios siquī jeē ní cacu i ĩn yucūn jeē jéni ni i jeē váha ga cúu. Chi sa suhva máni yucūn jeē ni jéjnūhun ya cúu ndije yucūn jeē chíhi ya cuenta. <sup>9</sup> Chi yáha cúu jnūhun jeē ni jéjnūhun ya nuū Abraham: Máá tiempo jeē ní jeni ri te quiji ri, te cacu ĩn sēhe yíí ñasíhí ró Sara, achí yá.

<sup>10</sup> Te nasūu máá yáha-ni, chi suni Rebeca ni cacu uū sēhe yíí ña, te ĩn-ni tátá ndíndúú i, jeē ní cuu jíí yō Isaac. <sup>11-13</sup> Te nde ná tu cacu ndíndúú i, te ná tu sáha i jeē váha jeē uhú, te je ni cahān yā jíín Rebeca: Sūchi ní cacu xīhna gā cuajníñu i nuū súchi sándíhí, áchí yá. Chi suni súcuan cáhán tutu i: Ni jito manī rī Jacob, te Esaú chi tuú, áchí Yaā Dios. Te súcuan jíín yō jeē maá Yaā Dios cuu nacāji ya ñayuu núu ndese téé ni maá yá, te nasūu síquī jniñu jeē sáha i, chi sa suhva siquī ndese cúní maá yá nacāji ya i.

<sup>14</sup> ¿Ndeese cahān yō núu súcuan? ¿A jéé tu íyó ndáa Yaā Dios jeē sáha ya súcuan, chí naún? Tú cuiti. <sup>15</sup> Chi nde jenahán ní cahān yā jíín Moisés: Ndé-ni cúu jeē cúní rī cundáhú ni rī, te cundáhú ni rī. Te ndé-ni cúu jeē cúní rī sáha ri jeē váha jíín, te sáha ri jíín, áchí yá. <sup>16</sup> Núu súcuan te nasūu síquī jeē cúní maá ñayuu, ni nasūu jéé nducú ndéyí máá i cúu, chi siquī ndese cúní maá yá cundáhú ni yā i. <sup>17</sup> Chi suni súcuan yósó núu tútu i jeē ni cáhān yā jíín rey ñuu Egipto: Ni jeni ri rohó jéé cúu ró rey, návāha jíín rohó te stéen rī poder rī, te návāha cuitē núu síhví rí níí ñáyíví, áchí yá. <sup>18</sup> Núu súcuan te núu ndé ĩn cúní yā cundáhú ni yā, te cundáhú ni yā. Te núu ndé ĩn cúní yā jeē cuníhni ni, te sáha ya jeē cuníhni ni.

<sup>19</sup> Te sanaa te cahān ĩn ró jíín rí: Núu súcuan cúu ¿te najehē cahán gā yā jeē cuēchi sáha yó? Chi ma cúu casi yō nuū yā jeē ndese cúní maá yá sáha ya. Achi rō. <sup>20</sup> Te sa suhva cáhán rī jíín ró: Róhó, ¿ndé ĩn cúu ró jéé jéni ni rō



stió cuñí rō nuū Yaā Dios? ¿A cuu cahān quīsi ñuhun jíin tée ni sáha: Najehē ni sáha ró rúhū súcuan? achi. <sup>21</sup> Chi tēe sáha quīsi, cuu sáha de ndese cúní maá de, chi iin-ni ñuhun cuu sáha de iin quīsi fino te inga quīsi corriente.

<sup>22</sup> ¿Te á tu jétáhú ró jeē suni súcuan sáha Yaā Dios jíin ñáyuu? Chi cúní yā steén yā ndese sáha ya juicio siquī ñáyuu, te súcuan te cuni i poder yā. Te vēsú súcuan te ni iyo paciencia ni yā jeē tu ní ndónnda yachī yā siquī ñáyuu jeē jnahnú ndetū. <sup>23</sup> Te sáha ya súcuan návāha steén yā ndese yōhyo luu cújéhnu ya siquī jniñu sáha ya jíin yóhó ñáyuu cúndáhú ni yā. Chi nde jenahán je ni sátūhva ya yohó jéē luu cújéhnu yó jíin yá. <sup>24</sup> Chi ni cana ya yohó jéē candíje yó, te sava yó cúu ñáyuu hebreo te sava yó cúu ñáyuu tāca gá nación. <sup>25</sup> Chi suni súcuan ni cahān yā, yósó núū tútu Oseas:

Ñáyuu jeē tu ní cúu ñáyuu maá rí, vijna te cahān rī jeē cácuu i ñáyuu maá rí.

Te ñáyuu jeē tu ní iyo manī rī jíin, vijna te cahān rī jeē cácuu i ñáyuu jeē manī rī jíin.

<sup>26</sup> Te máá lugar nuū ni cáhān rī jeē násūu ñáyuu rī cácuu i, suu yūcuan cáhān ñáyuu jeē cácuu i sēhe Yaā Dios, Yaā técu ní cání.

Achí yá. <sup>27</sup> Te Isaías sa suhva ni cahān de jnūhun ñáyuu Israel: Vēsú ni cayā yucūn Israel nájñūhun ñíť yumar, te jecu-ni i jnama ya. <sup>28</sup> Chi Jitoho yō Yaā Dios, yachī sínu ya jniñu jeē sándaā yā cuēchi ñáyuu ñayiví. Achí tutu. <sup>29</sup> Chi nájñūhun ni cahān tucu Isaías:

Máá Yáā cúu Jitoho nuū tācá ndajéhé andiví, núu tu ní jnáma ya jecu yucūn yō nuú,

te je ni ndoho yó nájñūhun ñáyuu ñuu Sodoma jíin ñuu Gomorra, jeē ní naa ndíhi.

Achí tutu.

*Jeē tu cájetahú ñayuu hebreo jnūhun jnama ya i*

<sup>30</sup> ¿Nde se cahān yō núu súcuan? Suu jeē ñayuu tāca gá nación, vēsú tu ní cánducú i quendōo ndaā i nuū Yaā Dios, te ni ndahva yā cuēchi i. Chi siquī jeē ní candíje i jeē ni jíhī Cristo jehē i cúu jeē ní ndahva yā cuēchi i. <sup>31</sup> Te sa suhva ñayuu Israel, vēsú cánducú i quendōo ndaā i nuū Yaā Dios sáha ley yā, te tu cúndeyí i quendōo ndaā i. <sup>32</sup> ¿Te najehē? Siquī jeē tu cánducú i jeē ndahva yā cuēchi i jeē candíje i jeē ni jíhī Cristo jehē i, chi sa jéni ni i jeē squícu máá i ley te quendōo ndaā i. Te jeē stívi i súcuan cúu nájnūhun cácotúú i siquī máá yúú jeē cácachihī jehē, te suu cúu Cristo. <sup>33</sup> Chi súcuan cáhán nuū tútu iī: Nde ñuu rī Sion sáha ri jeē cóne máá Yaā jeē cúu nájnūhun yuū jeē cácachihī i jehē i.

Te cúu ya nájnūhun toto jeē cotúú i sáha.

Te sa suhva ñayuu cáccandíje Yaā ún, chi jnama nahín yá i. Achí Yaā Dios.

## 10

<sup>1</sup> Hermano jijnáhan ró, cúu ndasí ni rī te jícán tahu rī nuū Yaā Dios jehē ñayuu nación rī Israel, jeē na jnáma ya i jíjnáhan i. <sup>2</sup> Chi cáhán rī jeē vāha cásáha i jeē ndihví ni i cáchiñúhún i Yaā Dios. Te vēsú súcuan te cáchiñúhún cáhá i. <sup>3</sup> Chi tu cájecūhun ni i ndese ndáhva Yaā Dios cuēchi ñayuu, te ndúcú i quendōo ndaā i máá-ni jeē squícu i ley. Te tu cájetahú i máá modo jeē ndáhva Yaā Dios cuēchi i. <sup>4</sup> Chi siquī jeē ni sáha Cristo te cuu quenda ñayuu chíji ley Moisés. Te ndáhva Yaā Dios cuēchi tāca ñayuu jeē candíje i jeē ni sáha Cristo jehē i.

<sup>5</sup> Chi súcuan ni tee Moisés jnūhun ñayuu jeē cánducú quendōo ndaā jíin ley: Núu ñn ñayuu cuu squícu i tācá jniñu ndácu ley, te cotecu i núú, áchí. <sup>6</sup> Te jnūhun jeē ndáhva Yaā Dios cuēchi ñayuu siquī jeē candíje i jeē sáha ya jehē i, chi sa suhva cáhán: Ma cáni ni rō jeē jíni

ñúhún caa ró andiví nasnúu ró Cristo jeē ndahva yā cuēchi ró. <sup>7</sup> Ni ma cáni ni rō jeē jíni ñúhún cuun ró ndé nuū cūnú ndonehen ró Cristo mēhñu ndíyi, nájñūhun jeē tu ní nátecu yā. <sup>8</sup> ¿Te ndese cáhán jñūhun un núu súcuan? Yajni íyó jnúhun ya jíin ró, chi ñúhun ini yuhu ró jíin ini anuá rō, achí tutu. Te suu cúu jñūhun jeē na cándije yó jéē jnáma ya yohó. Te jñūhun yáha cúu jeē cánacani ri. <sup>9</sup> Chi núu cahān rō jeē Jítóho rō cúu Jesús, te núu candíje ró jíin ini jíin ánuá rō jeē ní natecu yā mēhñu ndíyi ni sáha Yaā Dios, yūcuán na te jnama ya rohó. <sup>10</sup> Chi jíin ini jíin ánuá yō cándije yó jéē ni jíhī yā jehē yō, te súcuan te ndáhva Yaā Dios cuēchi yó. Te jeē cahán yō jeē Jítóho yō cúu Jesucristo, te súcuan te jnama ya yohó.

<sup>11</sup> Chi cáhán tutu iī: Tāca ñáyuu jeē candíje i ya, chi jnama nahín yá i, áchí. <sup>12</sup> Chi inuú-ni cúu ñayuu hebreo jíin táca gá ñayuu, chi máá yá cúu Jitoho nuū ndíhi yó, te cuehē jeē váha sáha ya jíin ñáyuu cácahān ndahú jíin yá. <sup>13</sup> Chi súcuan cáhán jñūhun ya: Ndíhi ñayuu cácahān ndahú jíin máá Jítóho yō, chi jnama ya i, áchí. <sup>14</sup> ¿Te ndese cahān ndahú i jíin yá te núu tu ní cándije i jeē jnama ya i? ¿Te ndese candíje i te núu tu ní jíni sōho i jñūhun ya? ¿Te ndese cuni sōho i te núu tú na ñayuu nacani jñūhun nuū i? <sup>15</sup> ¿Te ndese nacani ñayuu jñūhun ya te núu jeē tu tájí yá i quihīn i? Chi nájñūhun cáhán tutu iī: Yōhyo luu jniñu cásáha ñayuu cájica jíin jnúhun ndeyí sñ ni jeē cánacani i jñūhun vāha ya, achí.

<sup>16</sup> Te nasúu ndíhi i jétáhú nuū jnúhun jnama ya i. Chi ni cahān Isaías nde jenahán: Tátā Yaā Dios, ¿ndé ñáyuu ni candíje jñūhun jeē cánacani ná víi? áchí de. <sup>17</sup> Núu súcuan te núu cuni nahín ñayuu te cuu candíje i. Te jñūhun cuni nahín i cúu jñūhun Cristo.

<sup>18</sup> Te cájñūhun rí: ¿A tu ní cájini sōho i jñūhun un núu súcuan? Tuú chi ni cajini sōho i, chi cáhán tutu iī:

Níí ñáyīvī ní cajini sōho ñayuu jnūhun jeē ní canacani de. Te nde nuū jicá gá tāca lado ni jinū jnūhun ún.

Achí tutu. <sup>19</sup> Te suni cájnūhun rí: ¿A tu ní cájecūhun ni ñayuu Israel jnūhun ún? Tuú chi ni cajecūhun ni i, te tu ní cájetáhú i. Chi xīhna gā Moisés ni cachi de jeē ni cáhān Yaā Dios:

Cucuíñí ró jijnáhan ró, chi cuāha ri jnūhun ri nuū inga ñayuu jeē násūú ñn nación cúu.

Te quitī ni rō coto ró jéē cuāha ri jnūhun ri nuū ñn nación jeē tu jécūhun ni.

<sup>20</sup> Te suni Isaías ni chundeyí ni de ni cachi cājí de jeē ni cáhān Yaā Dios:

Ñayuu jeē tu ní cánanducú rúhū, ni cajini i ruhū.

Te nuū ñayuu jeē tu ní cácajnūhún, ni steén rī nuū i ndese Yaā cúu ri.

<sup>21</sup> Te siquī ñayuu Israel sa ni cahān de jeē ni cáhān yā: Ndiquivī ni cana ri i jeē quívicoo i nuū rī, te tu ní cácu ni i, chi ñayuu nīhni ni, ñayuu jéē ni cácuu i. Achí yá, achí Isaías.

*Jeē iyó jecu na ñayuu Israel jeē jnáma ya*

## 11

<sup>1</sup> Núu súcuan te cájnūhun rí: ¿A ní stóo Yaā Dios ñayuu maá yá Israel, chí naún? Tú cuítī. Chi ruhū suni tēe Israel cúu ri, te yucūn Abraham cúu ri, te Benjamín cúu jíí rī jenahán. <sup>2</sup> Tu ní stóo Yaā Dios ñayuu maá yá, chi je ni nacāji ya i nde jenahán. ¿A tu cájini rō ndese cáhán tutu íi jnūhun Elías, tēe ni nacani jnūhun ya jenahán? Chi náa jícán tahu de, te ni cahān de siquī ñayuu Israel: <sup>3</sup> Tátā Yaā Dios, ni cajehni i tāca tēe cánacani jnūhun ní, te ni cajenu i tācá altar ní. Te máñúhún na sāña ní quendōo, te vijna suni cácu ni i cahni i sāña, áchí de. <sup>4</sup> Te Yaā Dios ni nastió cuíñí yā: Iyó nahín úxā mil ñayuu cácandíje ruhū jeē tu ní cájecuñī yití i nuū ídolo naní Baal, achí yá. <sup>5</sup> Te suni

súcuan vijna, chi íyó jecu na ñayuu jeē ní nacāji ya siquī jeē váha ni yā jíin i. <sup>6</sup> Te núu ni nacāji ya i siquī jeē váha ni yā jíin i, te nasūu síquī jeē ni sáha i jniñu váha cúu. Chi núu síquī jeē ni sáha i jniñu váha cúu, yūcuán na te nasūu síquī jeē váha ni yā cúu.

<sup>7</sup> ¿Te ndese cúu núu súcuan? Cúu jeē ñáyuu Israel tu ní cúndeyí i quendōo ndaā i nájnūhun ni canducú i. Te sava i jeē ní nacāji ya, chi máá i ni ndahva yā cuēchi i. Te sava ga i ni ndunīhni ni i, <sup>8</sup> nájnūhun cáhán tutu íi: Ni sáha Yaā Dios jeē tu jécūhun cuiṭi ni i siquī yā, ni tu jíin i jíin tñnū i, ni tu jíni nahín i jnūhun ya, te súcuan cúu nde vijna. Achí tutu. <sup>9</sup> Te suni ni cahān David:

Vico jeē casáha i, na cóo nájnūhun ñin trampa chí ñin xeyū, návaha nihīn i castigo xeēn siquī jeē castívi i casáha i cuēchi.

<sup>10</sup> Te ánuá i na ndúnee, nájnūhun jeē tuá cúu coto i, te na jécostíhí jnūndóho siquī i ní cáni. Achí tutu.

Siquī jeē jnáma ya ñayuu tāca gá nación

<sup>11</sup> Núu súcuan te cájnūhun rí: ¿A tuá cúu cuiṭi ndīvi ñayuu Israel nuū Yaā Dios jeē súcuan ni castívi i? Tú cuiṭi. Chi sa suhva jeē ní cacunīhni ni i, te sa ñayuu tāca gá nación ni canihīn tahu máá i jnūhun jeē jnáma ya i. Te yūcuan sáha tucu jeē ñáyuu Israel condihvī ni i jeē suni candíje máá i. <sup>12</sup> Chi jeē ní castívi i, te sa ñayuu ní cáhnu ñayīvi ní canihīn maá i jnūhun ya. Te jeē ní cajica yátá i, suu ni sáha jeē ní canihīn ñayuu tācá nación jnūhun ya. Núu súcuan te quivī jeē ndívicoo tucu ndīhi ñayuu Israel ndaha ya, te ñayuu ñayīvi víhyá gā quendōo ndetū i sáha ún.

<sup>13</sup> Te vijna te cáhán rī jíin róhó ñáyuu tācá nación jeē tu ní jíin jnūhun ya. Chi ní tají Yaā Dios ruhū jeē scáca ri jnūhun nuū rohó ñáyuu tācá nación. Te ndúcú rí jeē

na cuájnuhún ró jijnáhan ró jniñu sáha ri jeē nácani ri jñuhun ya. <sup>14</sup> Chi cúní rī jeē jíin yúcuan te nacani ni sava jnáhan ri ñayuu Israel jeē suni candíje máá i, te jnama ya i. <sup>15</sup> Chi jeē ni stóo ya ñayuu Israel, jeē yúcuan cúu jeē sa ñayuu ñayiví ní sáha ya jeē ndívicoo i nuū jnúhun manī yā jíin i. Núu súcuan te quiv̄ naquihin tucu ya ñayuu Israel, quiv̄ ún suni vāha ndasí sáha ya jíin ñáyuu ní cáhnu ñayiví. Chi coo nájnūhun jeē natecu i jeē cúu i nájnūhun ndīyi. <sup>16</sup> Te ñayuu Israel cásocō i nuū Yaā Dios pan jeē quénda xīhna gā nuū ñujen, te súcuan stéén i jeē ndīhi un cúu cuenta yā. Te ñin yujnu, núu yíhi jeē cuenta yā cúu, te suu cúu nde yoho jíin ndé ndīhi ndaha. Te suni súcuan ñayuu Israel, yíhi cuenta i nuū yā, siquī jeē jíi i xīhna ñúhún, ni quívicoo de ndaha ya.

<sup>17</sup> Chi ñayuu Israel cácuu i nájnūhun ndayújnu olivo váha, te sava ndaha un ní quendē. Te róhó ñáyuu tācá nación jeē tu jíin jñuhun ya, cácuu ró nájnūhun ndayújnu olivo yucú, te ni nachuhun ya rohó núu ni quendē ñayuu cácuu ndayújnu váha ún. Te nájnūhun inuú-ni cástáa ró ndúxi jíin cajin jeē véji nde yoho yújnu ún. <sup>18</sup> Núu súcuan te ma sáha téyí ró maá ró nuū ñáyuu Israel jeē cácuu nájnūhun ndayújnu jeē ni quendē. Ma cutéyí ró, chi nucūhun ni rō jeē násūú jéē yoho stáa cajin nuū maá ró, chi sa máá ró stáa cajin jeē véji nde yoho.

<sup>19</sup> Te sanaa te cahān rō: Tú chi sava ndaha ni quendē návāha nachuhun ya ruhū nuū ni quendē ún, achi rō. <sup>20</sup> Ndaā, te ni quendē i siquī jeē tu ní cácandíje i Cristo. Te róhó chi máni siquī jeē cácandíje ró, jeē yúcuan cúu jeē ni quívicoo ró lugar i. Te ma sándúxí ró maá ró núu súcuan, chi sa suhva conso iyo ró núu Yaā Dios. <sup>21</sup> Chi tu ní íne cáhnu ni yā nuū maá ndaha jeē chíjñiñu, te suni súcuan ma cóne cáhnu ni yā nuū rō jijnáhan ró te núu stívi ró. <sup>22</sup> Núu súcuan te sáha vāha ro cuenta ndese vāha

ni Yaā Dios jíin ndese xeēn ni yā. Chi ni nduxeēn ni yā jíin ñáyuu hebreo jeē ní castívī ún, te sa cúndáhú ni yā rohó. Te cánuú cuiñi ñihin ro jíin jnúhun jeē váha ni yā jíin ró. Chi núu tuú, te suni quende yā rohó. <sup>23</sup> Te máá i, núu candíje tucu i, te nucōndee tucu i, chi máá Yaā Dios cuu nachuhun tucu ya i. <sup>24</sup> Núu súcuan te róhó ñáyuu tācá nación jeē tu ní jíin jnúhun ya, ni quendē rō xinī yújnu olivo yucú, te ni nachuhun ya rohó xínī yujnu olivo váha, vēsú nasūú ndaha máá yujnu un cácuu ró. Te nagā ni cuu ñayuu hebreo jeē ma náchuhun ya i nuū ni quendē i, chi cácuu i máá ndayújnu váha ún.

ñin quivī te jnama ya ndihi ñayuu nación Israel

<sup>25</sup> Hermano, cúní rī jeē na jécūhun ni rō jijnáhan ró ndese íyó jnúhun yáha jée ní yisāhí, návāha ma cutéyí ró cani ni rō jeē ndichí xínī maá ró: Chi sava ñayuu Israel ni ndunīhni ni i, te súcuan coo máá-ni nde quivī jínu candíje ñayuu tācá nación jeē tu jíin jnúhun ya. <sup>26</sup> Te saá te jnama ya ndihi ñayuu nación Israel, chi cáhán tutu i:

Ichi ñuu rī Sión quiji Yaā jnáma ñayuu,

te sáha ya jeē tuá coo cuēchi nuū tāca yúcūn Jacob.

<sup>27</sup> Te yāha cúu contrato jeē sándaā rī jíin i,

quivī jeē quénde ri cuēchi i jíjnáhan i, áchí Yaā Dios.

Achí tutu.

<sup>28</sup> Chi ñayuu hebreo un ní nduu i nájnūhun enemigo Yaā Dios siquī jeē tu ní cácandíje i jnúhun jnáma ya i. Te jeē yúcuan te cuu cuitē núu jnúhun un núū tāca róhó. Te vēsú súcuan te siquī jeē ní nacāji ya tāca jíi i jenáhán, te cúndáhú gá ni yā i jeē ma stóo ya i ní cáni. <sup>29</sup> Chi tu nácani yátá ni yā jeē cána ya ñayuu jíin jée jéhe ya tahū i. <sup>30</sup> Te róhó jíjnáhan ró, suni ni cahīyo ñihni ni rō nuū Yaā Dios nde saá. Te vijna jeē ní cacunīhni ni máá ñáyuu hebreo, te cúndáhú ni yā rohó. <sup>31</sup> Te suni súcuan máá i, chi vēsú

cácunīhni ni i vijna, te cundáhú tucu ni yā i, nájñūhun cundáhú ni yā maá ró jijnáhan ró. <sup>32</sup> Chi Yaā Dios ni sáha ya jeē ní quendōo ndívii ñayuu chíji jñūhun cúnīhni ni i, návāha suni cuu cundáhú ni yā ndívii i.

<sup>33</sup> Núu súcuan te nánhán nāā ni yō jeē yóhoyo cuehē jñūhun ndíchí íyó jíin Yaā Dios, te ndīhi cuiti jiní yā. Te ni ma cúu cuiti castūhun yó ndese téé ni yā sáha ya tācá-ni, te ma cánda cuiti yō jecūhun ni yō ndese cúu tāca jéé sáha máá yá. <sup>34</sup> Chi cáhán tutu iī: ¿Ndé ñin ni jecūhun ni ndese jéni ni maá Jítóho yō? ¿Chí ndé ñin ni steén nuū yā? <sup>35</sup> ¿Ndé ñin ni jēhe xīhna gā nuū maá yá, návāha nachunaa yā nuū i? <sup>36</sup> Chi nde nuū maá yá vēji tāca jéé iyó, te máá yá ni sáha ndīhi, te jeē cúu máá yá cúu. Te na cáhán yō jeē yóhoyo luu cújéhnu Yaā Dios níí cáni. Amén.

*Jeē na cóo ndoo ánuá yō cuajníñu yó núū Yaā Dios*

## 12

<sup>1</sup> Núu súcuan te cáhán ndahú rí jíin ró jijnáhan ró, hermano, jeē siquí jeē cundáhú ni Yaā Dios yohó. Na sócó rō maá ró núū yā, coo ndoo coo iī rō cuajníñu ró núū yā, nájñūhun cúsī ni yā. Chi yāha cúu jeē chíñúhún ró yā nde jíin ini jíin ánuá rō. <sup>2</sup> Te ma cáca ró jíin táca modo casáha ñayuu ñayīvi yáha, chi sa na sáma ró modo caní ni rō, te ndujeé jéé níjnūní rō. Te súcuan te cuu nacāji ró ndé-ni cúu jeē váha jeē núnjahan ni Yaā Dios, jeē cúsī ni yā, jíin jéé íje ni rō jíin jñūhun ya.

<sup>3</sup> Te siquí jeē váha ni yā ni jēhe ya jniñu nácani ri jñūhun ya, jeē yúcuan cáhán rī jíin ndīhi ró jéé ma cáni ni rō jeē váha ga ñayuu cúu ró núū cūhva jeē iyó ró. Chi ná ñin ná ñin ró na cáni ndaā ni rō siquí maá ró, te ma scáa ga rō caní ni rō jeē váha ga ñayuu cúu ró vēsú nuū cūhva jeē ni jēhe Yaā Dios fuerza ini rō cándíje ró. <sup>4</sup> Chi cácuu yó nájñūhun ñin yiquí cúñu jeē iyó cuehē parte, te sīn sīn



jéjníñu ìn ìn. <sup>5</sup> Chi vēsú iyó cuéhē yō, te nájñūhun ìn-ni yáqui cúñu cúu yó jēē yǎhi yó ndaha Cristo, chi ìn-ni ni nduu yó jíjñáhan yó.

<sup>6</sup> Te sǎn sǎn tahū ni jēhe Yaā Dios nuū yō jeē cuajníñu yó núū yā, núu ndese ni nujnahan ni yā ni jēhe ya nuū ìn ìn yó. Núu súcuan te na cuájníñu vāha yó jíín táhū ún. Núu ni nihīn yō tahū jeē nácani yó jñūhun ya, te cánuú sáha yó ndé maá cúhva ni jēhe ya cándíje yó. <sup>7</sup> Te núu ni nihīn yō tahū jeē chindéé ñáhán yó jñáhan yó, te na sáha yúcún yó. Te núu ni nihīn yō tahū jeē steén yō, te na cóndihvī ni yō steén yō. <sup>8</sup> Te ñayuu jeē stihví ni inga ñayuu, suni na sáha yúcún i. Te ñayuu jēhe nuū jñáhan, na cuáha i súcuan-ni. Te ñayuu ndíso jníñu, na ndácu vāha i jniñu. Te ñayuu jíto ndáhú ñayuu ndahú, na cúsiñ ni i sáha i.

### *Ndese cánuú squícu ñayuu cácandíje*

<sup>9</sup> Te na cúndáhú ndije ni rō jñáhan ró, nasūu máá jēē cahán-ni ró. Te coto uhū rō jniñu néé, te condiquīn rō jniñu vāha. <sup>10</sup> Te cánuú coo manī rō jíín jñáhan ró nájñūhun jēē maní rō jíín ñani rō. Te nducú ró jeē quéndōo yǎñúhún gá jñáhan ró vēsú maá ró.

<sup>11</sup> Te ma cucúxí ró jíín jniñu cásáha ró. Chi jíín ini jíín ánuá rō cóndihvī ni rō cuajníñu ró núū maá Jítóho yō.

<sup>12</sup> Te na cúsiñ ni rō jeē cáñuhun ni rō tāca jēē vāha jeē cóo. Te na cuándeyí ni rō núu ndóho ró jnúndóho. Te níni na cácan tahú rō.

<sup>13</sup> Te coto ndáhú ró ñayuu cácandíje núu cúmanī nuū i. Te cuāha núu ró vehe nuū ñáyuu cájica.

<sup>14</sup> Te cacān tahú rō jehē ñayuu cájito xeēn rohó. Ma cahán ndevāha ro síquī i, chi sa cacān tahú rō jehē i.

<sup>15</sup> Te núu cúsiñ ni ñayuu, te suni na cúsiñ ni rō jíín i. Te núu cúcuíhyá ni ñayuu, te suni na cúcuíhyá ni rō jíín i.

<sup>16</sup> Na cóo ìnuú ni rō jíín táca jnáhan ró. Te ma cundúxí ró, chi sa quijnáhan ró jíín ñáyuu núu ga. Ma cáni ni rō jeē ndichí xínī rō.

<sup>17</sup> Te ma nasáha ndevāha ró jíín ni ìn ñáyuu, núu ni sáha ndevāha i jíín ró. Na cóndihvī ni rō sáha ró jniñu váha, jíto jíínúū tāca ñáyuu. <sup>18</sup> Te na cóndihvī ni rō coyūcu mánī rō jíín táca ñáyuu, vēsú ndese cándāa máá i. <sup>19</sup> Ñánī mánī jijnáhan ró, ma nácuāha ró jéē ndútahū ñáyuu casáha ndevāha jíín ró, chi sa cuāha ró jnúhun jeē maá Yaā Dios cuāha ya castigo i. Chi cáhan tutu iī: Máá rí cuāha castigo i, máá rí nacuāha yāhu i, áchí Jítóho yō. <sup>20</sup> Te suni cáhan tutu: Tēe jíto uhū rohó, núu jíí de sōco, te cuāha ró jéē cáji de. Te núu jíchí de, te cuāha ró jéē cóho de. Chi núu sáha ró súcuan, te cucanu de te nacani uhū ni de jeē ni jíto uhū de rōhó. <sup>21</sup> Ma cuāha ró jnúhun jeē cúndeyí jniñu néé jíín ró, chi sa jniñu váha na sáha ró návāha ndahvā jniñu néé.

## 13

<sup>1</sup> Tāca ñáyuu na cuátáhú i nuū tohō cándiso jníñu ñuu. Chi ma cóo tēe cándiso jníñu te núu tu ní sáha máá Yaā Dios. Te tēe cándiso jníñu chi Yaā Dios ni tee jniñu siqū de. <sup>2</sup> Te ñáyuu jeē tu jétáhú núu tēe cándiso jníñu, núu súcuan te cúniñni ni i nuū jeē ní jeni Yaā Dios. Te ñáyuu jeē cúniñni ni, chi cuēchi sáha i, te nihīn i castigo. <sup>3</sup> Chi tāca tēe ndíso jníñu, nasūu jéē ndíso jníñu de jeē yūhú ñáyuu casáha jniñu váha, chi sa jeē yūhú ñáyuu casáha jniñu néé. Te núu cúni rō jeē ma cúxeēn tēe cándiso jníñu nuū rō, na sáha ró jniñu váha núu súcuan. Yūcuán na te cuajnúhún de rōhó. <sup>4</sup> Chi jéjníñu Yaā Dios de jíjnáhan de, návāha coyūcu váha ró jíjnáhan ró. Te núu sáha ró jniñu néé, te sa yūhu ró, chi nasūu cáha-ni cúu jeē cándiso jníñu de stóho de ñáyuu. Chi jéjníñu Yaā Dios de, návāha cuāha

de castigo ñayuu casáha jniñu néé. <sup>5</sup> Jeē yúcuan cánuú jéē cuatáhú ró núū tēe cándiso jniñu, te nasūu máni jeē ma níhín rō castigo, chi suni jeē tú na cuēchi coo ánuá rō. <sup>6</sup> Te jeē yúcuan cúu jeē suni cájēhe ró xúhun núū tēe cándiso jniñu cuu jniñu ñuu. Chi jéjníñu Yaā Dios de, te máni jniñu yúcuan casáha de.

<sup>7</sup> Te chunaa rō ndihi jeē cátaū rō nuū tāca ñáyuu. Cuāha ró xúhun ñuu nuū tēe stútú xúhun ñuu, te cuāha ró xúhun renta nuū tēe stútú renta. Te na cóo respeto rō nuū ñáyuu cánuú coo respeto rō. Te na cóo yíñúhún ró nuū ñáyuu cánuú coo yíñúhún ró. <sup>8</sup> Ma cótaū rō nuū ní ñn. Te íyó ñn jeē taú rō jeē ma tahndé cuiti, suu jeē ni cáhān Yaā Dios jeē cundáhú ni rō jnáhan ró. Chi ñayuu cundáhú ni jnáhan, je ni squícu i ndihi jeē ndácu ley yā. <sup>9</sup> Chi súcuan ndácu ley jniñu: Ma cosíquí ndéē rō jnáhan ró, ma cáhni rō ndīyi, ma sacuíhná ró, ma sajnúhún ró, ma ndíyo ni rō jeē névāha jnáhan ró. Te tāca jnúhun yáha jíín táca gá jniñu ndácu ley, ndihi-ni yíhi chíji jnúhun yáha: Cundáhú ni rō jnáhan ró nájñūhun cundáhú ni rō maá ró, áchí tutu. <sup>10</sup> Te núu cundáhú ni yō jnáhan yó, te tu sáha yó ni ñn jeē tu íyó váha nuū i. Núu súcuan te jeē cundáhú ni yō jnáhan yó, yúcuan cúu jeē squícu yó níí ley yā.

<sup>11</sup> Súcuan sáha ró jíjnéhan ró, chi sáha ró cuenta jeē cuácuyajni quivī ndíji ya. Te ma cóo ga rō nájñūhun ñayuu quixí, jeē cúhuun ni rō. Chi vijna je ni cuyajni ga quivī jnáma ya yohó vēsú quivī ní candíje yó jnúhun ya. <sup>12</sup> Chi nájñūhun je yajni yáha jecuāā, te cuacundijin quivī jnáma ya yohó. Núu súcuan te na stóo yó jniñu jeē ni sáha yó núū néē, te na cúcutú yó jíín táca jniñu ndaā jeē caca yó jíín luz yā. <sup>13</sup> Na cáca yíñúhún yó nájñūhun cánuú caca yó jíín luz yā. Ma nájini ró, ma sáha ró táca vico néé, ma cáca jnéni ró, ma sáha ró jniñu néé, ma cuajnéhan ró, ma cucuésún ni rō. <sup>14</sup> Chi sa suhva cuiñi cutú ró jíín fuerza

maá Jítóho yō Jesucristo, jeē ma cuáha ga rō jnūhun sáha ró jniñu cúní modo neé máá ró.

*Ma cahán neé yó coto yó jnáhan yó*

## 14

<sup>1</sup> Cuatáhú ró ñayuu jeē ná tu ije jíin jnūhun ya, te ma tejnáhan ró jíin i siquī tāca jnūhun jeē sñin jéni ni i jíin máá ró. <sup>2</sup> Chi íyó ñayuu jeē jéni ni i jeē cúu caji i ndīnuū-ni. Te íyó ñayuu jeē ná tu ije jíin jnūhun ya, te cájeni ni i jeē tú vāha caji i cūñu, chi jeē ní casocō ñayuu nuū ídolo cúu. <sup>3</sup> Te róhó téee jeē yéji ndīnuū-ni, ma cahán rō coto ró téee jeē tu yéji ndīnuū. Te róhó téee jeē tu yéji ndīnuū, ma cahán rō coto ró téee jeē yéji ndīnuū. Chi Yaā Dios ni jetáhú yá téee ún. <sup>4</sup> Te róhó, ¿ndé ñin cúu ró jéē cahán neé ró jító ró mozo Yaā Dios? Chi núu vāha chí neé sáha de, te máá yá cúu jeē sándaā jíin de, nasūu máá ró. Te tuú chi cuiñi vāha de, chi mozo máá Jítóho yō cúu de, te cuu sáha ya jeē ma stívi de.

<sup>5</sup> Te suni íyó ñayuu jeē jéni ni jeē íf gā ñin quivī vēsú inga quivī. Te inga ñayuu chi jéni ni i jeē ñnuú-ni cúu tāca quivī. Te tācá i na cúndaā vāha ni máá i siquī jeē jéni ni i. <sup>6</sup> Chi tēee jeē neé ñi quivī, chíñúhún de máá Jítóho yō jeē sáha de súcuan. Te tēee jeē tu neé ñi quivī, suni chíñúhún de Jítóho yō jeē sáha de súcuan. Te tēee jeē yéji ndīnuū-ni, chíñúhún de máá Jítóho yō jeē sáha de súcuan, chi nácuatáhú de nuū Yaā Dios. Te tēee jeē tu yéji ndīnuū, suni chíñúhún de Jítóho yō jeē sáha de súcuan, te suni nácuatáhú de nuū yā.

<sup>7</sup> Chi ni ñin yó tu técu yō jeē váha máá-ni yó, te ni ñin yó tu jíhí yō jeē cúní máá yó. <sup>8</sup> Chi núu técu yō, te técu yō jeē cuajniñu yó núu máá Jítóho yō. Te núu cuu yō, te suni cuu yō siquī jeē cúní máá Jítóho yō. Núu súcuan te núu jeē cótecu yō chí jéē cuu yō, te yfhi yó ndaha Jítóho yō.

<sup>9</sup> Chi ni jihī Cristo te ni natecu yā, návāha cuu ya Jitoho nuū ñáyuu ni jihī jíín ñáyuu técu.

<sup>10</sup> Te róhó, ¿naun jéni néé ni rō jíto ró jnáhan ró núu súcuan? ¿Te naun cújéé ni rō jíto ró de? Chi tāca yó cuiñi yó yuhu mesa Cristo jeé sándaā yā jniñu yó. <sup>11</sup> Chi suhva yósó núu tútu i:

Jendaá ndije chi nuū maá rí cuiñi yítí táca ñáyuu, te ndihi i cahān jeé maá rí cúu Yaā Dios, áchí máá Jítoho yō.

<sup>12</sup> Núu súcuan te ná ñn ná ñn yó nacuāha yo cuenta nuū Yaā Dios ndese jniñu ni casáha yó.

*Ma sáha yó jéé quívi jnáhan yó cuéchi*

<sup>13</sup> Te jeé yúcuan ma cahán neé gá yō coto yó jnáhan yó. Chi sa tee ni rō jeé ma sáha ró ni ñn jniñu jeé sáha jeé stívi jnáhan ró te quívi i cuéchi. <sup>14</sup> Te jíni rī jeé ni ñn jeé ni sáha Yaā Dios, tu stívi ánuá yō. Chi súcuan ni cucáhnū vāha ni rī síquī jeé candíje ri Jitoho yō Jesús. Te núu ñn ñayuu jéni ni i jeé iyó jéé stívi ánuá i, yūcuán na te súcuan sáha un jíín máá i. <sup>15</sup> Te núu jnáhan ró tu cúvāha ni de jeé yéji rō cūñu ni casocō ñayuu nuū ídolo, chi jéni ni de jeé stívi un ánuá rō, núu súcuan te tu cúndáhú ni rō de jeé sáha ró súcuan. Coto má snáā rō anuá jnáhan ró síquī jeé yéji rō ñn jeé jéni ni de jeé cuéchi cúu. Chi suni jehē maá de ni jihī Cristo. <sup>16</sup> Ma sáha ró jniñu jeé cahán i síquī, vésú jiní maá ró jeé iyó váha. <sup>17</sup> Chi jeé ndácu Yaā Dios jniñu nuū yō, nasūu síquī ndese caji yō coho yó cúu, chí sa suhva síquī jeé na sáha yó jniñu ndaā, te coyūcu mánī yō jíín jnáhan yó, te cusī ni yō sáha Espíritu Santo. <sup>18</sup> Te ñayuu jeé súcuan jéjníñu nuū Cristo, chí cusī ni Yaā Dios jíín i, te suni cájejnúhún ñáyuu i.

<sup>19</sup> Núu súcuan te na cóndihvī ni yō coyūcu mánī yō, návāha jíín yúcuan chindéé ñájnañhan yó ije yó jíín jnúhun

ya. <sup>20</sup> Te ma cuáha ró jnúhun jeē ndeyu yéji rō snāā jniñu ni sáha Yaā Dios jíin jnáhan ró. Chi iyó ndoo ndije ndihi jeē yéji yō, te vēsú súcuan te tú vāha jeē yéji rō ndeyu jeē sáha jíin jnáhan ró jēē caji de jeē jéni ni de jeē cuēchi cúu. <sup>21</sup> Vāha ga ma caji rō cūñu, ni ma cóho ró vino, te ni ñn ma sáha ró jēē stívi ánuá jnáhan ró, te quívi de cuēchi, te caca yátá de nuū jnúhun cándíje de. <sup>22</sup> Te núu cándíje ró jēē tú na vé sáha jeē yéji rō, te súcuan na cándíje máá-ni ró núu Yaā Dios. Te nacā ndetū tēe jeē tu sáha jíin ánuá de jeē cuēchi cúu núu caji de coho de. <sup>23</sup> Te tēe yéji ñn jeē jéni ni de sanaa te stívi ánuá de, núu súcuan te sáha de cuēchi, chi tu cándíje de jeē iyó vāha jeē yéji de. Chi tāca jēē sáha yó, núu tu cándíje yó jēē iyó vāha, te cuēchi cúu.

*Jeē na sáha yó jēē cúsiñ ni jnáhan yó*

## 15

<sup>1</sup> Te yóhó jēē ni ije yó jíin jnúhun ya, cánuú condito yó ñáyuu jeē ná tu ije jíin jnúhun ya, návāha cándíje vāha i. Te ma sáha yó jēē maá-ni yó cusíñ ni. <sup>2</sup> Chi ná ñn ná ñn yó na sáha yó jēē cúsiñ ni jnáhan yó, návāha quendōo vāha i te ije i jíin jnúhun cándíje i. <sup>3</sup> Chi ni Cristo, tu ní sáha ya jeē cúsiñ ni maá yá, chi sa suhva jeē cúsiñ ni Tatá yā. Chi suhva cáhán tutu íi: Tāca jnúhun ndevāha jeē cácahān ndevāha ñayuu siquí ní, ni ndívi siquí maá ná, áchí Cristo jíin Tátá yā. <sup>4</sup> Chi tāca jnúhun jeē ni jecosō nuū tútu íi nde jenahán, chi ni jecosō návāha stéén nuū yō, te nihin yō jnúhun jeē sáha jeē cuandeyí ni yō te ndusiñ ni yō. Te súcuan te cocuhun ni yō tāca jēē vāha jeē cóo. <sup>5</sup> Te máá Yaā Dios jeē jéhe jnúhun cuandeyí ni jíin jnúhun ndusiñ ni, na sáha ya jeē cóo inuú ni rō, nájnūhun cúní Cristo Jesús. <sup>6</sup> Te súcuan te ñn-ni coo ró te inuú-ni cuu cahān rō jeē yóhyo vāha Yaā cúu Yaā Dios, Tátá Jitoho yō Jesucristo.

*Jeē ni jítē jnūhun vāha ya nuū ñáyuu tācá nación*

<sup>7</sup> Núu súcuan te cuatáhú ró tāca jnāhan ró, nájñūhun ni jetáhú Cristo yohó, návāha cuni ñayuu jeē luu cújéhu Yaā Dios. <sup>8</sup> Chi cáhán rī jeē ní quiji Cristo Jesús, ni sáha ya tācá jniñu jeē quéndō vāha ñayuu hebreo, návāha cundaā tāca jnūhun jeē ni jéjnūhun Yaā Dios nuū tāca jíí i. Te súcuan ni steén Cristo jeē squícu Yaā Dios tāca jéē ni jéjnūhun ya. <sup>9</sup> Te suni ni quiji ya návāha ñayuu tācá nación jeē tu jíín jnūhun ya, cahān i jeē yóhoyo vāha ni Yaā Dios jeē cundáhú ni yā i. Chi suhva cáhán tutu i:

Núu súcuan te cahān na jéē yóhoyo vāha ni ní, cuni ñayuu tācá nación,  
te cata ná yaa jeē chiñúhún ná nihín.

<sup>10</sup> Te cáhán tucu tutu i:

Róhó ñáyuu tācá nación, inuú na cúsi ni rō jíín ñáyuu maá yá.

<sup>11</sup> Te cáhán tucu:

Róhó ñáyuu tācá nación, na cáhán rō jeē yóhoyo vāha ni Jitoho yō Yaā Dios,

te róhó ñáyuu tācá-ni ñuu, suni na cáhán rō jeē yóhoyo cújéhu ya.

<sup>12</sup> Te suni ni tee Isaías jnūhun yáha:

Nuū yúcūn Isaí quiji ññ jeē cujéhu,

te ndacu ya jniñu nuū ñáyuu tācá nación.

Te ñayuu ún chi cocuhun ni i tāca jéē sáha ya.

Achí tutu.

<sup>13</sup> Te máá Yaā Dios jeē sáha jeē cáñuhun ni yō tāca jéē váha jeē coo, na sáha ya jeē cóo siñ ndasí ni rō jíín jéē cóo ndeyí ni rō siquí jeē cácanđije ñihin ró yá. Te súcuan te cocuhun teyí gá ni rō tāca jéē váha jeē coo, sáha poder maá Espíritu Santo.

<sup>14</sup> Ñánī mánī, cúcáhu ni rī jeē váha ndasí cándihvī ni rō jíín jniñu váha, te vāha ndasí cájecūhun ni rō, te cúu stíhví

jnáhan ni rō. <sup>15</sup> Te ni jeni ni rī jeē tee ri carta yáha cáhān cají rí jíin ró jijnáhan ró, návāha víhyá gā na cócuhun ni rō tāca jnúhun yáha. Chi súcuan sáha ri siquī jeē váha ni Yaā Dios te ni jēhe ya jniñu nuū rī <sup>16</sup> jeē jejníñu ri nuū Jesucristo, jeē nácani ri jnūhun nuū ñáyuu tācá nación jeē tu jíin jnūhun ya. Te nácani ri jnūhun vāha Yaā Dios nuū i jeē jnáma ya i. Súcuan sáha ri návāha ñayuu tācá nación, cuu squívi ri i ndaha ya jeē cúu i nájñūhun ñin jeē socó rī nuū yā jeē cúsiñ ni yā jíin. Chi ni sáha Espíritu Santo jeē iyó ndoo íyó íi i nuū yā.

<sup>17</sup> Núu súcuan te siquī jeē candíje ri Cristo Jesús, te cúsiñ ni rī jeē jejníñu vāha ri nuū Yaā Dios. <sup>18</sup> Chi ma cúu cahān rī siquī jniñu cásáha ñga tēe, chi máa-ni siquī ndese ni jejníñu Cristo ruhū jeē sáha ri jeē ñáyuu tācá nación tu ní jíin jnūhun Yaā Dios, vijna jétáhú i nuū yā. Chi súcuan ni cuu jíin jnúhun ni cahān rī jíin jniñu ni sáha ri. <sup>19</sup> Chi ni sáha ri jniñu jéhnú ndíso poder jeē steén jeē cujéhnú ya, te ni iyo poder Espíritu Santo jíin rí. Te súcuan ni nacani ndihí ri jnūhun ndese jnáma Cristo ñayuu. Te ni nacani ri nde ñuu Jerusalén, jíin ndihí tācá ñuu, jíin nde ñí región Ilírico. <sup>20</sup> Súcuan cúu jeē ní condihví ni rī ni nacani ri jnūhun jeē jnáma ya ñayuu. Te ni jehēn rī nuū ñáyuu jeē ná tu cuni jnūhun Cristo, chi tu ní cúní rī nacani ri nuū ñáyuu jeē jé ni jini i ni canacani ñga tēe. <sup>21</sup> Chi sa suhva ni sáha ri nájñūhun cáhān tutu iī:

Tāca ñáyuu jeē tu ní quíji jnūhun ya nuū i, vijna chi cuni i jnūhun ya,

te tāca ñáyuu jeē tu ní jíiní cuiñi jnūhun ya, vijna chi jecūhun ni i.

Achí tutu.

*Jeē ñúhun ni Pablo jeē quihín de Roma*



## ROMANOS 15:22 41 ROMANOS 15:33

<sup>22</sup> Te jeē yúcuan cúu jeē cuehē jínu ni cujnéñu ri, te tu ní cúu jecondēhe rí rohó jíjnáhan ró. <sup>23</sup> Te vijna chi ni ndíhi jniñu ri ní cáhnu tācá región ndañúū yáha. Te je ni cuu cuehē cuiyā jeē cuní rī jeē rī nuū rō. <sup>24</sup> Núu súcuan te ñúhun ni rī jecondēhe rí rohó jíjnáhan ró núu na yáha ri quihīn rī España. Te ñúhun ni rī jeē núu je ni cusī ni rī jeē ní jito jnáhan yó, yūcuán na te chindéé ñáhán ró ruhū jeē quihín gā rī. <sup>25</sup> Te xīhna gā na quihín rī ñuu Jerusalén quíndēca ri xūhún cuu hermano cáyūcu yúcuan. <sup>26</sup> Chi ñayuu Macedonia jíin Acaya ni cajeni ni i jeē cáquin i xūhun quihīn nuū hermano cándoho ndáhú ñuu Jerusalén. <sup>27</sup> Chi súcuan ni cacusi ni i ni casáha i. Te íyó váha jeē súcuan, chi máá i jeē cácuu i ñayuu tāca gá nación, táu i jeē sáha vāha i nuū ñáyuu hebreo un. Chi ñayuu hebreo ni casáha jeē ní quiji jnūhun Yaā Dios nuū i jeē quéndōo vāha ánuá i sáha. Jeē yúcuan cánuú jéé chindéé ñáhán i ñayuu hebreo cácandíje jíin ndajniñu ñayīvi yáha. <sup>28</sup> Núu súcuan te jeē jínu jniñu yáha jéé quíndēca ri xūhun yáha nuū i, yūcuán na te jecondēhe rí rohó jíjnáhan ró jéé yáha ri quihīn rī España. <sup>29</sup> Te jíni vāha ri jeē quivī jinú rī nuū rō, te vāha ndasí quendōo ró jéé nacani ga rī jnūhun vāha Cristo nuū rō.

<sup>30</sup> Hermano jijnáhan ró, cáhán ndahú rí jíin ró jeē chindéé ñáhán ró ruhū cacān tahu rō jehē rī nuū Yaā Dios síquī jniñu ndúcú ndéyí rí. Súcuan sáha ró síquī jeē candíje yó Jítóho yō Jesucristo, jíin síquī jeē cundáhú ni yō jnáhan yó sáha máá Espíritu. <sup>31</sup> Te cacān tahu rō jeē na cácu ri nuū téé región Judea jeē tu cácandíje, jíin jéé na cúsi ni tācá hermano ñuu Jerusalén jeē quíndēca ri xūhun yáha cuu de. <sup>32</sup> Te súcuan te núu cuní Yaā Dios te jecondēhe rí rohó jíjnáhan ró, te cusī ni yō, te nanihīn ni rī jeē condee rī jíin ró. <sup>33</sup> Te máá Yaā Dios jeē jéhe jnūhun ndeyí sī ni, na cóo ya jíin ró jijnáhan ró. Amén.

*Jeē cahán Pablo jeē sándeýí ni i*

## 16

<sup>1</sup> Te vijna te cáhán rī jíin ró jijnáhan ró jéē na chindéé ñáhán ró hermana Febe, chi cúu ña ñahan jéjníñu jeē siquí jnúhun ya nuū ñáyuu cácandíje ñuu Cencrea. <sup>2</sup> Te cuatáhú ró ña nájñuhun cúni maá Jítoho yō, chi súcuan cánuú sáha hermano cácandíje. Te chindéé ñáhán ró ña na-ni vé cúu jeē jíni ñúhún ña, chi súcuan ni chindéé ñáhán maá ña cuehē ñayuu, te suni nde ruhū.

<sup>3</sup> Cahán rō jíin Priscila jíin Aquila jeē sándeýí ni ndíndúú de, áchí rí, chi cáchindéé ñájnáhan de jíin rí siquí jníñu Cristo Jesús. <sup>4</sup> Chi ná ni iyo jnūndóho jeē cuu rī nuú, te ni cachundeyí ni de ni canducú de scácu de ruhū, vésú suni cuu maá de núú. Te nácuatáhú rí nuū ndíndúú de, te nasūu máa-ni ruhū, chi suni tāca grupo ñayuu cácandíje tācá nación. <sup>5</sup> Te suni cahán rō jíin ñáyuu cácandíje ndútútú vehe de, sándeýí ni i, áchí rí. Te cahán rō jeē sándeýí ni Epeneto, tēe manī rī jíin. Chi ñuu Acaya, máa de cúu jeē ní candíje xihna gā nuū Cristo. <sup>6</sup> Suni cahán rō jeē sándeýí ni María, ñahan jeē ní jejniñu ndasí jeē siquí jnúhun ya mēhñu ró jijnáhan ró. <sup>7</sup> Te cahán rō jeē sándeýí ni Andrónico jíin Junias, tēe cácuu jnáhan ñuu rī jeē ní cahíin jíin rí vecāa. Te tācá apóstol chi cájejniñuhún de ndíndúú tēe jíiná, te xihna gā de ni cacandíje Cristo vésú maá rí.

<sup>8</sup> Cahán rō jeē sándeýí ni Amplias, tēe manī rī jíin, chi cándíje de Jitoho yō. <sup>9</sup> Te cahán rō jeē sándeýí ni Urbano, tēe chindéé ñájnáhan jíin yó siquí jníñu Cristo Jesús, te suni súcuan Estaquis, tēe jeē maní rī jíin. <sup>10</sup> Suni cahán rō jeē sándeýí ni Apeles, tēe jeē ni stéén jeē candíje vāha de Cristo, te suni súcuan cahán rō jíin ñáyuu vehe Aristóbulo.

<sup>11</sup> Cahán rō jeē sándeýí ni Herodión, tēe cúu jnáhan ñuu

rī. Te suni súcuan ñayuu vehe Narciso jeē cá candíje maá Jítóho yō. <sup>12</sup> Te suni cahān rō jeē sándeyí ni Trifena jíin Trifosa, ñahan cásájniñu siquī jnúhun maá Jítóho yō. Te suni sándeyí ni Pérsida, hermana jeē maní yō jíin, chi suni ni sájniñu ndasí ña siquī jnúhun Jitoho yō. <sup>13</sup> Te cahān rō jeē sándeyí ni Rufo, tēe cájejnúhún ñayuu jeē vāha cándíje de maá Jítóho yō. Te suni súcuan cahān rō jíin náná de, te maá ña suni ni jito ña ruhū nájñuhun jeē naná rī cúu ña. <sup>14</sup> Te cahān rō jeē sándeyí ni Asíncrito jíin Flegonte jíin Hermas jíin Patrobas jíin Hermes jíin táca hermano jeē cáyūcu jíin de. <sup>15</sup> Te suni súcuan Filólogo jíin Julia jíin Nereo jíin cuáha de, jíin Olimpás jíin ndíhi hermano cá candíje cáyūcu jíin de jíjnáhan de.

<sup>16</sup> Te jeē cahán táca ró jíin jnáhan ró, te yíñúhún techūhu ró ndaha i. Te táca grupo ñayuu cá candíje nuū Cristo, cáhán i jeē na sándeyí ni rō.

<sup>17</sup> Te cáhán ndahú rí jíin ró, hermano jijnáhan ró, jéé cóto ró maá ró nuū ñayuu cútuco ni te ndúcú stívi jnáhan jíin jnúhun tu quíjnáhan jíin jéé ní cacutúhva ró. Te cujiyo ró núu i jíjnáhan i. <sup>18</sup> Chi ñayuu súcuan, tu jéjñiñu i nuū Jítóho yō Jesucristo, chi máni ndíhví ni i siquī jeē cáji i. Te yōhyo ndúxí i jíin jnúhun cácahān i, te súcuan stáhú i ñayuu jeē tu jíní vāha. <sup>19</sup> Te maá ró jijnáhan ró, chi je cájini ndíhi ñayuu ndese vāha cájetáhú ró nuū yā, te jeē yúcuan cúsiñi ni rī. Te cúni rī jeē cóo listo vāha ró sáha ró jniñu vāha, te ma sáha ró jniñu néé. <sup>20</sup> Te maá Yaā Dios jeē jéhe jnúhun ndeyí síñi ni, yachí sáha ya jeē cúndeyí ró siquī jexeén jeē cúu Satanás. Te níñuhun ni rī jeē Jítóho yō Jesucristo na sáha ya jeē vāha róhó jíjnáhan ró.

<sup>21</sup> Sándeyí ni rō jijnáhan ró, áchí Timoteo, tēe chíndéé ñáhán jíin rí siquī jnúhun ya. Te suni súcuan cácahān jnáhan ñuu rī Lucio jíin Jasón jíin Sosípater.

<sup>22</sup> Te ruhū jeē naní Tercio, jeē tée ri carta yáha jéē cahán Pablo, suni cáhán rī jeē sándeyí ni rō jeē cácandíje ró Jítóho yō.

<sup>23</sup> Te Gayo, tēe ni jēhe núu vehe ndéé rúhū Pablo, cáhán de jeē sándeyí ni rō jijnáhan ró. Te suni jēhe núu de vehe nuū tāca ñáyuu cácandíje. Te suni súcuan cáhán Erasto, tēe cúu tesorero ñuu yáha, te suni súcuan cáhán hermano Cuarto.

<sup>24</sup> Te ñúhun ni rī jeē maá Jítóho yō Jesucristo, na sáha ya jeē váha róhó jijnáhan ró. Amén.

*Jnúhun sánd* ĩhi jéē cahán jeē yóhyo cújéhnu ya

<sup>25</sup> Te vijna na cáhán yō jeē yóhyo cújéhnu Yaā Dios. Chi máá yá cuu sáha jeē cuñi ñihin ga rō jijnáhan ró jíin jnúhun jnáma ya rohó jeē nácani ri, jíin jnúhun Jesucristo jeē steén rī. Chi súcuan ni steén Yaā Dios jnúhun sāhi yá, jeē ní yisāhi ní cáni nde ná tu jecō ñayíví. <sup>26</sup> Te vijna te je ni nane cájí. Chi jíin tútu ĩi jeē ní catee tēe ni canacani jnúhun ya, ni jitē núu jnúhun sāhi yáha nuū ñáyuu tācá nación, návāha candíje i te cuatáhú i. Chi Yaā Dios jeē técu ní cáni, súcuan ni ndacu ya jniñu.

<sup>27</sup> Te ní cáni na cáhán yō jeē yóhyo cújéhnu Yaā Dios siquī jniñu ní sáha ya jeē jíin Jesucristo. Chi máá ĩn-ni ya iyó te yóhyo ndíchí yá. Súcuan na cóo. Amén.

## Nuevo Testamento en mixteco

New Testament in Mixtec, Atatláhuca (MX:mib:Mixtec, Atatláhuca)  
copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

### Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

**© 1973, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 14 Jun 2022 from source files dated 13 Jun 2022

9665e546-39d0-5bd5-8b10-38916a94951f